

ASO LULU, 03 FEPUARI 2021

Na nofoia e le Sui Fofoga Fetalai le Nofoa i le itula e 9:25 i le taeao, e tusa ai ma Tulafono Tumau 27(1).

Tatalo.

SUI FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Tau ia ina ou ufitia ulutao aua le Maota tulutuluitao, aua o lea ua afifio ma papaaao le paia mauuluga o le Palemene, o Taitai filifilia o le atunuu, lele ua soo ai taiao e pei o le tala e fai i le fale o Po ma Ao. E faatalofa ma faafeiloai i leni taeao fou. Malo le soifua, malo foi le folau. E i ai le agaga mauuluga o le a sologa manuia Taulumaga o le Fonotaga i leni taeao.

E faatalofa foi i le tapuaiga a Samoa ua manuia faiva o le Palemene o lo o po fala ma tui mai le mulipapaga ina ia ae manuia faiva o leni tausaga.

**TULAFONO TAU FAAOFI O LE FAATATAUINA O TUPE
FAAOPOPO (NU.1) 2020/2021 – felafolafoaiga faaauau
i luga o le faitauga faalua – Aso 11**

SUI FOFOGA FETALAI: E tolopo Galuega a le Fono Aoao i le Fono ananafi o lo o saunoa le sui usufono o le itumalo faaalaalafaga o Faasaleleaga Nu.3. O lea ua manatu ai ou te tapa le sui usufono mo Faasaleleaga Nu.3 e tulai mai e faaauau le saunoaga.

Afioga TOFA FOLENI LIO TAMA GALU (Faasaleleaga Nu.3): Faafetai i lau Afioga i le Sui Fofoga Fetalai, o lea ua muamua mea i Matautusa tatou te sula ma faafetaia le alofa silisili o le Atua, aua o le Atua e faamaoni pea Lona agalelei i leni Palemene ma le Malo, ae tainane le tapuaiga a Samoa o lo o tapuai mai. O le mea lea e momoli atu le faafetai tele i lau Afioga i le Sui Fofoga Fetalai i leni taeao, o lea foi ua matauina o lea ua e seei mai, malo mo le faaaogaina o tofi ma tiute e pei ona valaauina ai lau Afioga.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E faaopoopo foi se agaga faafetai i le Atua ona o lea sa tofafa ma malolo i le pogisa ua mavae, tele faafitauli o mala ma puapuaga e lamatia ai le soifua ma lo tatou ola, e le gata i lenei Palemene a o Samoa aoao, i aiga o lo o tapuai mai ma itumalo. Faafetai. Faafetai i le Atua o lo o i ai pea Lona alofa ma Lona agalelei ia Samoa. O a foi faafitauli o faigata o faamai, ia aemaise lava suiga o le tau e pei ona tatou molimauina i lenei vaitau, ae maeu lava le alofa o le Atua. O le mea lea le Atua, matou te vivii atu i lau Afio, faafetai i Lou alofa, afai lava na e faia le tagata o le faatusa paia o lau Afio, o lo matou tiute lava lea, o le faafetai ma le vivii i lau Afio leaga o oe o le Atua e faamaoni.

O le mea lea, o le agaga faafetai lea i lenei taeao, o lea foi ua vaavaai atu ua malumaunu le Maota i Tiafau, lea ua nofoia pou o lauga, aua Samoa ma lana Faigamalo ma le Palemene, malo faafetai. Ae toe ofo alofa atu lau Afioga i le Sui Fofoga Fetalai, malo le papale, malo foi i galuega.

E faatalofa atu foi i lau Afioga i le Palemia, Taitai o le tatou Malo aemaise le Kapeneta mamalu, le mamalu o usugafono i lenei taeao ma le usufono o le Malo, ia, malo le soifua manuia. Ia, malo foi le faamalosi, aua le valaauina o lo outou mamalu, ma tatou uma filifilia mai itumalo ma nuu, aua lava le Malo o Samoa ma ana feau.

O le mea lea, faafetai i lenei taeao, faafetai foi o lo o manuia le tapuaiga a Ofisa Sili o Pulega o Matagaluega ma lenei Maota, ae a Samoa ma le tapuaiga. Faafetai i le Atua. E pei o le viiga lava lea i lenei taeao, e ui lava ina louloua le tau, ae faafetai le lototetele ma le onosai e faatino lo tatou valaauina e pei ona tatou i ai i lenei vaiaso. O le aso foi ua 3 ai aso o lenei masina fou, masina o Fepuari, o lea lava e folau manuia le sa o Samoa i lenei foi vaitau o le tausaga seia oo atu ia Mati, ia o vaitau leaga, ae ua tele lava se suiga. E pule le Atua, afai o le Atua na foafoa mea uma, o le Atua lava e pule i mea uma lava, a o le agaga faafetai i lau Afioga i le Sui Fofoga Fetalai, ona o lo o maua pea le avanoa e le sui usufono mo Faasaleleaga Nu.3 e toe faaauau ai se matou lauga po o se matou leo aua upufai o Malo ma le Fonousu a Samoa i lenei aso.

O le autu lava o le lauga a lenei itumalo, o le agaga faafetai i le Malo ma le atunuu. Ma o le auau lava o le lauga, o le mea lelei i Upolu, e lelei foi mo Savaii, o le mea e lelei i Savaii, lea foi ua lelei i Upolu. O le mea lelei i Apia ma Upolu, la le ua lelei ai foi Salelologa ma Savaii. E pei o le auau lava lena o le lauga.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O ananafi sa amata se faafetai i atinae o le taulaga lea i Salelologa. Faafetai i le tofamamao a le Malo aemaise Taitai ua mavae atu ma Paeaiga, ia o lea lava e faaauau e le tatou Paeaiga ma le Nofoaiga le atinae pea o lenei taulaga i Salelologa. Ia, o lea sa ou tautala i le NPF, faafetai i lenei galuega tele e aoga mo le motu i Salafai, o lea foi sa asiasi i ai le Malo i lenei tausaga, ia o lea lava e alu lava le galuega. Ou te iloa po o le masina fou ua maea lenei galuega tele, atoa ai foi ma nisi galuega, aua o le agaga o le taulaga, o lea lava o le a...

SUI FOFOGA FETALAI: Malie le sui usufono o lo o saunoa, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, ou te tulai atu ma le ava tele i lenei taeao, e faatalofa atu foi i le mamalu o le tatou Maota. E momoli foi lau faafetai i le sui usufono o lo o saunoa nei, o le ala lea o lou tulai atu.

Ou te tulai atu ou te auai faatasi i le faafetai i le Atua sa molia e lau Afioga, na molia foi e le sui usufono o lo o saunoa nei, faafetai ai i galuega ua maea ona fai, aua o mea ia e tataua ona o tatou faia. E manino lelei, a maea se galuega tatou te faia, o se atinae, tatou te nonofo lelei ai i lalo ma ave le faafetai i le Atua, o tatou o auauna le aoga i tatou, o Ia na faatupu manatu i nei mea tatou te faia. O Samoa o le atunuu kerisiano.

Lau Afioga i le Fofoga Fetalai, o le taua lenei o lou tulai atu. Ina ua tulai mai le iuga o le faiga palota lautele talu ai, e 47 sui usufono o le Vaega lenei, na o le 3 e le i auai mai, ma leai ai ma se Itu Agai. O le fonousu lava a le Vaega Faaupufai, e manatua e lau Afioga e manatua foi e Laauli, sa ou talanoa ai faa-Taitai o le Vaega i le taua o le mea lenei o le agaia o le Malo, o aga ia faa-Palemene o lea tatou te sosolo ai i Malo faa-Palemene, e taua le i ai o le Itu Agai e agaia le Malo. Latou te tuualalo. O le a le mea na fai? Na tatou talanoa ma fai ai le faaiuga, o le a fai lava le Itu Agai a le tatou Malo, e laitiiti tofiga o Minisita na faataoto mai e le Faavae, e laitiiti e le tofutofusia uma ai se Vaega toatele, o e o lo o fia tautua i tulaga faa-Minisita po o tulaga foi faa-Minisita Lagolago, ona fai ai lea o le iuga. O le a fai le Itu Agai our own Home Grown Opposition ma e le o se Itu Agai e faataga fai, o lea lava e molimau lau Afioga i le Fofoga Fetalai, e matua fai lava le Agai e malosi, e paoa. E oo lava ia te au, tulai mai foi sui usufono o le Vaega lenei ma faatulai mai foi latou mea e fia faasao.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ia o lea foi sa ou faasaoa ananafi se tasi o au Minisita. Aua o mea ia e ola ai Fonotaga a le Palemene, o le i ai o se agai, ae ua mafai nei lava e le tatou Palemene i luga o le finagalo o Samoa o le a leai se Itu Agai, o lea e i ai le tofa paia, le tofamamao i Taitai o le Vaega Faaupufai e 47 Taitai mai itumalo, 47 na latou faia le tonu lea, faatasi ai ma sui usufono ua tatou le toe auai. O le a la le mea lea e tupu? O lea e sologa lelei. Ina ua uma le faiga palota i nai aso, na omai ai Polofesa o mea tau polokiki mai Ausetalia e fai le tatou Semina. O lea la ua uma lau tautalaga ma ou faaalua i ai le mea lea, ua fai lava le Agai a le Malo ona susu mai lea o le Polofesa ma faapea mai, o le mea tonu lea na ou fia talanoa ai, a o lea ua outou faia lava e outou le fofu. E le i tupu i se isi atunuu le mea lea, o le i ai lava o le Itu Agai e fai lava i totonu o le Vaega Faaupufai o lo o Tu Malo. A o le fesili o ai na faapea ai iuga o le faiga palota? O le finagalo o Samoa lea na fulisia ai i le Vaega lenei. O se finagalo e aliai ai le tofa mamao Faa Samoa.

Lau Afioga i le Fofoga Fetalai, e maoae foi manatu e faatupu manatu ai le Atua ia i tatou, o outou o Taitai. O le isi lea ou tiute, o le Taitai o le Maota nei, ou te faamaumauina igoa o i latou, e 30+ le Vaega lenei, tatou te omai tatou te failotu faatasi, ave le viiga i le Atua e fesoasoani mai e musumusuina o tatou mafauaiga, a o faagasolo le soalaupulega, i le avatū aumaī, o a tatou lauga ia i le aso. Tatou failotu faatasi i le taeao, failotu faatasi i le afiafi ma taape ai.

Lau Afioga i le Fofoga Fetalai o le a le mea lea e tupu? O lea ua toe agai e le Malo le Malo. O fea ea o i ai faipule o lo o tetee mai? Faatoa sau le isi ua uma le lotu. E pei o le aga lea a lea foi Vaega, aua e le o i ai se Itu Agai aloaia ile Palemene. A o lea lava ua i ai le Itu tetee, e pei e le fia omai i ni lotu. O ananafi foi, e le i taitai uma le Fono a ua o ese uma. O a ia faiga? O lona uiga, e le fia lolotu faafetai i le faaiuga o le tatou Fono e pei ona amatamea toe faaiumea i le Atua. O lo'u tiute lena lau Afioga faa-Taitai o le Maota, o le mataitu o aga ia e fai i totonu o le tatou Maota nei. O le a la lea ituaiga Vaega. E pei o se vaega foi lele, e pei o se paopao e opeopea ae leai se Kapili. Lau Afioga i le Fofoga Fetalai, e leai se kapili. Na ou tau musu lava, na ou tau to manatu ou te tau mafaufau i se isi upu, ae ou faalogo atu lava, ua le mafai lava. O le a la le mea o le paopao e leai se kapili? E tafeafea ma taamilomilo ai lava i le mea e tasi ma folau, a agi mai lava le matagi suaki atu i lea mea, agi mai le matagi suaki ane i lea ogasami.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

A o lea tatou te o ma fai i le atunuu, filifili matou, sui le Malo. E sui i ni tagata e omai faaopeopea faapea? E le fia auai i a tatou lotu e tuu atu faatasi i le Atua e taitai tatou, toe o ese foi ananafi e le i taitai uma le Fono. E le fia auai foi i a tatou lotu. A o le a le igoa? Faatuatua i le Atua ua Tasi. O a ia ituaiga igoa paia e igoa ai ae ese mea e fai?

Lau Afioga i le Fofoga Fetalai, o lou tulai atu lena ou te faafetai i le sui usufono, ua le gata ina faafetai i le Atua i le taitaiina mai o le soifua o Taitai o le atunuu i totonu o le Maota lenei, a o lea foi ua e toe faafetai i galuega faatino, galuega sa auai le Atua, o tatou ia na o le mulimuli lava, a o le Atua na te faatonu folau. Lau Afioga i le Fofoga Fetalai, ia o lou toe tulai atu lena i lenei taeao e avatu sina popolega ia te au, i sui sui le Malo, ae omai tagata faapaupau, fai le Malo.

Lau Afioga i le Fofoga Fetalai, ia o lou faaopoopo atu lena i le saunoaga a le sui usufono.

Susuga Hon Laauli Polataivao Leuatea (Gagaifomauga Nu.3): Ma le agaga faaloalo Lau Afioga i le Fofoga Fetalai, e fia maua se avanoa.

SUI FOFOGA FETALAI: Malie le sui usufono o lo o tulai mai, se i faailoa mai i le tulaga aloaia le tulaga o lo o fia saunoa ai.

Susuga Hon Laauli Polataivao Leuatea: Lau Afioga ua faafofoga Samoa i nei foi upu ua lafo mai, malie lau Afioga o la e tapuai le atunuu, aumai se avanoa se i fai atu se tala. E le o se faataumatatao ae na ona faamalalama. Lau Afioga i le Palemia...

SUI FOFOGA FETALAI: Saunoa le sui usufono.

Susuga Hon Laauli Polataivao Leuatea: Ia, o lea ua tatou faafetai i le Atua i lenei taeao fou, ua fou foi lenei aso ma ou te taofi ua fou mea uma. Ae lagona lava le agaga faanoanoa ma le mafatia, o lea foi ua e tulai mai e tau le pua ma e lafo. O lo o faaauau pea le le taliaina o le tuualalo na avatu ananafi. Tuilaepa, faifaimalu ou faiva ma au saunoaga, o lenei lava e folo le oona o upu ma tala ia e lalafo mai, ma e faalumaluma mai ma faamataga mai lenei Itu.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

SUI FOFOGA FETALAI: Ua ou faauilavea i le sui usufono o lo o saunoa... O lea ua maua lou finagalo, ma e lelei ona avatu e le Nofoa se faaiuga o le mataupu lea.

Susuga Hon Laauli Polataivao Leuatea: Malie lau Afioga, malie Tuilaepa, malie lou finagalo. Afai ua tau lau ta i le isi itu, o lea ua liliu atu le isi itu. Ou te faamagalo i lau Afioga, o la e faafofoga le atunuu. Tuilaepa, malie lou finagalo, aua e te taaloalo i lagona o tagata, taalo i le polo, aua e te taalo i le tino. That is a very dangerous play.

SUI FOFOGA FETALAI: Malie le sui usufono o lo o saunoa o lea ua fai atu le tala a le Nofoa e lelei ona utagia. Alaala i lalo le sui usufono mamalu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o se mea e fia faamalamalama atili.

SUI FOFOGA FETALAI: Ia, se i tuu atu le avanoa i le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o tatou o Taitai, o tatou o Taitai o le atunuu. O lea tatou te tulai mai e fai o tatou tiute. O le isi lea ou tiute, o le Taitai o le Maota, o lea e avatu lau tuualalo, o le tuualalo o le alofa molipo. O lea sa ou talanoa atu, i le taimi faatoa ou tulai mai ai o le sui usufono, i le 1981, o le 2021 lenei, ua 40 tausaga. E le umi lava ona fai le Fono lau Afioga ae ta le logo, e le atoa le numera. E le o se upu leaga la lea ou te faia, o se tuualalo faufautua ia te i tatou na filifili mai e o tatou itumalo, tatou te omai e faataoto tulaga o taijala lelei, taijala lelei e faafoe ai le Malo. O le a le mea lea e tupu? O upu ua alu, sui le Malo, sui le Malo, sui le Malo. O aga ia e omai e fai ai? O ni aga ia? A o tatou o Taitai o le atunuu. A e iloa le mea e tatau ona fai, fai. A e iloa le mea e tatau ai ona fai le tuualalo, fai le tuualalo. A o le tagata e fefe e fai le mea sao ma tautala i le mea sao, e le o se foliga lena o se Taitai. O lea la se leaga? o la e faafogafoga mai Samoa. O ni upu leaga ia ou te fai atu ai? O ni fautuaga leaga? Lau Afioga i le Fofoga Fetalai, o fautuaga lelei.

Susuga Hon Laauli Polataivao Leuatea: O le upu lea o le paopao e leai se kapili. Tuilaepa, aveese upu ia.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e... le sui usufono...

Susuga Hon Laauli Polataivao Leuatea: E le o matou ni paopao. E faapefea ona e faalumaluma matou? E faapefea ona e lafo nei upu? E le o matou o ni paopao e leai se kapili.

SUI FOFOGA FETALAI: Alaala mai i lalo le sui usufono se i maea atu le sui usufono o lo o saunoa ona tuu atu lea o le avanoa.

Susuga Hon Laauli Polataivao Leuatea: Tuilaepa, o lea matou te tuualalo atu... tuu ia, se faamolemole o lea ua aioi atu...

SUI FOFOGA FETALAI: Malie le sui usufono lea mo Gagaifomauga Nu.3, o lo o fai atu le tala a le Nofoa.

Susuga Hon Laauli Polataivao Leuatea: Lau Afioga i le Fofoga Fetalai, tu i lou tiute e te tutoatasi. O lea lava e feau mai upu.

SUI FOFOGA FETALAI: Se i alaala mai i lalo le sui usufono se i fai atu le tala a le Nofoa. E le faatonua mai i ina le Nofoa.

Susuga Hon Laauli Polataivao Leuatea: Ua faafofoga Samoa, se ua lailai tagata.

SUI FOFOGA FETALAI: Malie le sui usufono e alaala mai i lalo. O le faasoesa, i lalo o a tatou Tulafono Tumau le le usitai i le faatonuga a le Nofoa. O lea lava e tausivaatele e le tatou va nonofo. E i ai le agaga o le Nofoa, o le saunoaga a le Taitai o le Maota o se fautuaga talafeagai mo taualumaga o le tatou Fonotaga. Ua matauina pea le tulaga, ma o lea foi ua maea ona faatonuina le Failautusi e tusi i lalo taimi, o le afifio ma le tala mai o aao o sui usufono filifilia o le Maota i lenei Itu ma lenei Itu.

Ae malie le sui usufono mo Gagaifomauga Nu.3, o lea lava ua e saunoa i tulaga uma, lavapapale ma utagia se taumafai atu a le Nofoa, o lou tiute lea o le tausiga o le filemu o le Fonousu a le atunuu. O se avanoa foi ou te faailoa aloaia ai i tulaga aloaia faanoi ua uma ona taunuu mai i le Nofoa.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le Afioga i le sui usufono ia Tuifaasisina Misa Lisati Palemene o lo o tuatuagia i Salafai i tulaga faaleaiga. E faapena foi le fetalaiga ia Namulauulu Papalii Sami Leota. O le Afioga ia Faumuina Wayne Fong o lo o tuatuagia i tulaga o Faamasinoga e pei ona tuuina mai, ma ua talia foi lona le auai. E faapea foi le fetalaiga ia Lenatai Tamapua o lo o ua logo mai le Nofoa o lo o gasegase ua le maua le malosi e faapena ona faaauau ai foi foi tiute.

E faapena foi lo outou silasila mai i lenei taeao i le paia o le Palemene ma Samoa o lo o tapuai mai, ua le maua foi le malosi e le Afioga i le Fofoga Fetalai i tulaga o le faaauauina o le tiute ma le valaauina, a o lea ua ou faaauauina, ua ou taumafai e foefoe malie tulaga o le tatou Fonotaga, ia sologa manuia mea uma ma usitai i tatou Tulafono Tumau a le Maota.

Ia, i le faafofoga a le Palemene ma Samoa, o fautuaga lava aua o tatou o tofi filifilia mai le atunuu, e tatau ona faatino o tatou tiute. E tatau ona tatou auai i taimi amata e faapena foi i taimi e faaiuna ai tatou Fonotaga i lea aso ma lea aso. O le agaga lea o le fautuaga. O le mea la lea e toe fautuaina ai sui usufono uma, e lelei ona utagia lo tatou valaauina, o lo o silasila mai... O lea foi e live i le tatou TV, o lo o silasila mai le atunuu, e tatau lava ona tatou auai i le taimi e amata ai a tatou Fonotaga.

O le tulaga o le mataupu e pei ona talanoaina, ua ou manatu o le a ou tuuina atu le faaiuga i le mataupu lea. O lea ua aumai le fautuaga ua aumai foi le tuualalo a le sui usufono e pei ona tulai mai. O le agaga lena, faaiu i i le mataupu lea, e le tatau ona toe talanoaina.

Ma le faaalalo ou te tapa le sui usufono mo Faasaleleaga Nu.3...

Susuga Hon Laauli Polataivao Leuatea: Se malie lau Afioga i le Fofoga Fetalai, se malie lava, Nafaitoa, e tuga upu ia e faalumuluma matou o paopao e leai ni tapili. Se malie lau Afioga, aveese upu ia ma faamaumauga a le Maota. E mataga, e faalumuluma le Sao Faapito ma matou, Salega ma Faleata ma lou sui usufono. Se malie lau Afioga, o a upu a faalumuluma isi ua aveese, ae o a upu a saunoa le Palemia e le aveesea?

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le mea e fia faasao.

Susuga Hon Laauli Polataivao Leuatea: Se fai i lau tofa Nafaitoa.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

SUI FOFOGA FETALAI: O lea ua maua atu e le Nofoa se i maea ona tuu atu lea o le fesili.

Susuga Hon Laauli Polataivao Leuatea: O le tatalo lena. Tuilaepa, se i seu fuafua o lea e tapuai le atunuu.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga o le mea e fia faasao.

Susuga Hon Laauli Polataivao Leuatea: Taalo i le polo, aua le taalo i le tino.

SUI FOFOGA FETALAI: Laauli alaala mai i lalo se i tuu atu le avanoa i le Taitai o le Maota. Malie mai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga o le mea e fia faasao, ou te le i fai atu o latou o ni paopao e leai ni kapili. Na ou fai atu, o amio ia, o amio e faatusa i ni paopao e leai ni kapili. O le amio lea sa ou talanoa ai, ae sa ia te au ona tau outou o ni paopao.

Lau Afioga i le Fofoga Fetalai, ia o le tulaga lena. O le amio lea ou te talanoa ai.

SUI FOFOGA FETALAI: O lea ua toe aumai le faamaninoga, o le na saunoa i upu, o ia foi e i ai le faamaninoga o mea ia. O le mea la lea...

Ia, se i tulai mai Olo, alaala i lalo Laauli. Tulai mai Olo.

Susuga Hon Laauli Polataivao Leuatea: Se malie Nafotoa, na tulai mai foi le mea lea ananafi o au e ona le upu ae faauiga e le Palemia. O fea la le sao o ia mea i lenei taeao? O au e ona le upu ae fai mai e faauiga e ia? A o lea la ua saunoa nei ae fai mai... o.

SUI FOFOGA FETALAI: Se i saunoa mai le Taitai o le Maota.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaaauau i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, na ala ona ou talanoa i le mea lena, e manino lava upu a le sui usufono ananafi, talofa e ua lailoa Samoa talu ai le Palemene. E te le i faapea mai la, ua lailoa Samoa ona o ni uiga e pei o le Palemene. Lea na e matua tau sao lava le Palemene. Vaai la i le eseese o mea o upu e lafo? Matau lelei upu.

Susuga Hon Laauli Polataivao Leuatea: O lena e te mimilo au upu. O lena e te mimilo au upu, a o la e faafofoga tapuai le atunuu.

SUI FOFOGA FETALAI: Malie Laauli se i alaala mai lava i lalo. O le tatou Tulafono Tumau, a fai atu se tala a le Nofoa ona alaala lea i lalo o sui usufono. Faafetai.

O le tatou Tulafono Tumau lau Afioga i le sui usufono mo Gagaifomauga Nu.3, e manino lava auofala i lau matau mai. O le faatonuga e le sui usufono o le Nofoa e le talafeagai, e taumauualoina ai le Nofoa.

O le mea lea ou te fautuaina le sui usufono mamalu, seu le manu ae tagai i le galu. O lea lava ou te le i papai lava i tulaga e tataua ona faatino, ae le foi le Nofoa pe a oo ina fai atu le Nofoa, ae faasoesa pea. O le mea lea, malie sui usufono, ou te tautala ma le faaalalo, o le naunautaiga lava o le Fonousu a Samoa, ia toamalie na tatou sii ai le viiga i le Atua. Ae afai e tu pea aga ia e le talafeagai ma le Fono Mauuluga lena i Samoa. E tataua loa i le Nofoa ona faaoga Tulafono Tumau. O lea ou te toe fautuaina ai sui usufono mamalu uma, ia utagia se vaivai o le Nofoa. O au nei, a o oe taeao, malie le finagalo o sui usufono uma, utagia se faamatalaga a le Nofoa. A ou faamutaina le mataupu, malie, malie le finagalo, o le iuga lea o le mataupu e tusa ma le Tulafono Tumau. E le o se manao o au, e taitaitama, e faatonufofola le Tulafono Tumau ua uma ona e silafia foi na e nofo i le Nofoa lena. O le mea lea ou te talosaga ai ma le agaga faaaloalo, a o faafofoga le atunuu, ne i mea ane foi ua matau mai. O le agaga lea, o lea ua uma ona ou avatu le faaiuga, malie afenoa le tofa faaaauau le galuega a le Maota i lena taeao. Ma le faaaloalo.

Susuga Hon Laauli Polataivao Leuatea: Ua ou toe faamalulu atu, ua ou tulai atu lava lau Afioga i le Fofoga Fetalai, malu ave i fale lou finagalo. Ua foi foi se lagona, ae alo i luma le tatou Fonotaga i lena taeao.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

SUI FOFOGA FETALAI: Ia faafetai, Laauli, faafetai tele, afai o le tofa lea, tofa i le Atua, faafetai ua e amanaia tulaga e masani ai le Maota lenei. O le tofa faatupu e foe ai mea uma i le avafatafata ma le faaaloalo. Olo o lea lava ou te vaai e te taumafai mai. O le sui usufono mo Salega se i tulai mai.

Tofa Olo Fiti Afoa Vaai (Salega Sasae): E faafetai tele lau Afioga i le Fofoga Fetalai, ua maua foi si o matou avanoa. E faafetai atu foi i lau Afioga, le lavapapale, e tulaga masani lava ia, e le i leva foi ona tatou faatauanauiina le Agaga Paia o le Atua e afio mai tatou fono faatasi. Ae paga lea, o lea foi ua i ai nai vaega, ae ui i lea, i le suafa manumalo o Iesu ou te tuli ese ai le tiapolo ma totonu o le Maota lenei. Lau Afioga i le Fofoga Fetalai, o le manaia ia o le saunoaga a le sui usufono, le Afioga i le Minisita Lagolago i le tulaga o atinae foi o lo o amatamata nei, i le motu i Salafai, si o matou motu. Ae o le aoga tonu lava lea, e pei ona saunoa le Afioga i le Palemia, o le aoga tonu lava lea o se Itu Agai. Ia matau mai lau Afioga, ua 15 tausaga o ou Itu Agai, ma e le taitai lava ona tuu lau galuega, leaga o le galuega fai faatasi o le agaia o le Malo.

O le uiga o lau faamatalaga lau Afioga i le Fofoga Fetalai, na ou taunuu mai i le 2006, na alu alu lava, te i lava ua feeseeseai aga a matou toeaiina e toa-lua, le maua le matou numera 8. Ona le maua loa lea e matou o le seleni lea e uunaia ai e le tatou Faigamalo, i le atinae o Vaega Faaupufai, ina ia malosi mai se Itu Agai, ae peitai o le Paeaiga lena 2006 – 2010, na alu alu lava le toe maua se matou tupe, ona ua le atoa le matou toa-valu, ia ona tufatufa mai lea o si a tatou amio lena pe \$200,000. Ona oo mai foi laia i le 2011 sau agai i luma. Ua le toe tufa faapea \$100,000 le itu lea, ae \$100,000... ae ua tufa faasoloatoa mo tatou. I le Paeaiga lenei lau Afioga i le Fofoga Fetalai, o lea ua matua leai, ua lipiola ma se mea e atinae ai le Itu Agai. E ese mea ia e fai...

SUI FOFOGA FETALAI: Malie le sui usufono mo Salega

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E pei e ese le mea lea e agai mai ai le sui usufono, a o le tulaga lea, o aga a ai? O mea lava na tatou faia i totonu o le Maota lenei, ma faataoto ai le itu lea o le Itu Agai, ina ia ausia le fuainumerra e 9. Ona faatoa aloaia lea i totonu o le Maota lenei o se Itu Agai. Ia manatua la, e 51 le aofai o faipule. E mafai lava la ona i ai ni Itu Agai se 5 po o se 6 foi.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Lau Afioga i le Fofoga Fetalai, e mafai lava la ona i ai ni Itu Agai se 6. A o le mea lea ua tupu, e lelei lou faalauiloaina o le mea lenei. Sa i ai lava seleni sa fesoasoani ai i a tatou Itu Agai e faagaoioi ai Itu Agai, i le taimi a o tulai mai Tupua faasolo mai i ina. Ona sau sau lea, te i ua malepe le Itu Agai, e le o ni aga la a le Malo. A o le mafuaaga o le malepe, ua feeseeseai le Itu Agai, talu ai o le alu lava o le latou Taitai ma uunai Tumua ma Pule ma Aiga, e fai a latou solo tetee mai i le Malo, o le treason le igoa o le mea lena. Aemaise o le lagaia o Tumua ma Pule ma Aiga, o lea sa solo tetee agai i... Aiga Tumua ma Puleono i Salafai lea e saofafai i totonu o le Maota lenei o le Palemene o Samoa.

Lau Afioga i le Fofoga Fetalai, e taua lava lou faamalamalamaina o le mea lea. Na amata mai lava i le 1994, alu le solo tetee, 1995 alu le solo tetee, 1996 alu le solo tetee, 1997 alu le solo tetee, 1998 alu isi solo tetee. E le i misia se tausaga, o le isi solo tetee, na faavae i luga o saina e toa 200,000+, ave i uta i Le Ao o le Malo, o le agaga ia tuliese le Faigamalo lenei, ae aumai le Taitai o le Itu Agai ma le tamai fuainumera lava, latou te taitaia le Malo. O le a le mea na tupu i le mea lena? Na amo mai faila tetele o saina nei, ona aumai lea i le Malo ona faatu lea o le Komisi e latou te suesueina. Na aumai polofesa mai fafo e tilotilo i ai i le mataupu lenei o Saina Tetee i le Malo ona e ogaoga. Aemaise o lea ua fesiligia i i, le malosi o lo o avatu i lalo o le Tulafono, i Le Ao o le Malo ma le malosi o lo o avatu i le Palemia. O le a le iuga o le Komisi lena ma le latou Suesuega? E le faamaonia. E na o le 11 lava saina na faamaonia. A o isi saina uma e pei lava e 250,000, o i inei ma tagata i fafo. E pau lava o igoa sa tusi ai, Sione, Simi, Aokuso, leai ni faaiu, leai ni latou address, na faaleaogaina ai e le Komisi Suesue pei o se mea faaulaula. A o le iuga o le savaliga lena o le tetee mulimuli, e faliu mai le Taitai o le Itu Agai le Palemene o lo o faagasolo le saunoaga a le sui o Faleata i Sasae, le sui matua lava o Faleata i Sasae, ma laulau ai i totonu lona le fiafia, i le mea lea o le pulepuletutu, o le alu lava o le latou Taitai Savali Tetee e aunoa ma le tapa o se finagalo o le Pati.

O le a le tala a Tofilau, “Ua pau la outou Vaega mai i le 9 i le 8, e mafai ai ona aloaia se Itu Agai i totonu o le Maota.” Na faatu le lafo ina ia toe tuu ifo i lalo le numera mai le 9 i le 8 faipule i totonu o le Palemene faatoa aloaia ai se Pati. O le upu a le Palemia, “Tupua, o lea e te naunau ma e asosi e te fia taitaia le atunuu lenei. Afai e te lē mafai ona faamaopoopo se toa-iva e lagolagoina oe, o le a faapefea ona e taumafai e pulea le atunuu atoa?”

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaaauau i luga o le faitauga faalua**

Lau Afioga i le Fofoga Fetalai, o le tulaga lena, ae le o ni aga a le Vaega lenei. Sa faaaauau lava fesoasoani ia tau tupe mai le tatou Malo, ina ia faaaupega ai latou galuega. Ia lava le seleni ae fua i le toatele o faipule o lo o i ai. O le mea lena e fua i ai. O le a la le mea na tupu? Na faaoga lelei e le HRPP ana seleni e fai ai lona Maota, lona ofisa tutotonu faafaigaluega tagata, e i ai taavale e faagaoioi, o tupe e alu i le faiga o le pa e puipui ai le fanua. E i ai le taimi na saunoa mai ai foi le sa teutupe ia matou o Laauli, e tatau ona fai le pa. Na ou taofia, a fai i ni a? A o lea e vaaia tupe a le HRPP, e teu e ia. Ia o lea la, e na o le pa foi lea uaea la e i ai, e i ai ana tagata faigaluega... O le tulaga lena, na ala ona ou le manao e fai le mea lena, aua manu e aumai foi lana konekarate pa maa e fai.

Susuga Hon Laauli Polataivao Leuatea: O le mea e fia faasao lau Afioga i le Fofoga Fetalai. Ou te le i teutupe i le HRPP. Se malie ia, malie lau Afioga... o lena e fai lava le taufaasese...

SUI FOFOGA FETALAI: Malie lau Afioga se i maea ona tuu mai lea o lou finagalo. Se i maea pea le faamaninoga ma le faamalamalamaga a le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi: O le mea sa'o, o le mea sa'o lava lea ou te talanoa atu ai. Leaga e molimau uma le vaega, e molimau uma le vaega. Lau Afioga i le Fofoga Fetalai, o lea la e tutu mai galuega, totogi ma le lisi e \$8,000 i le tausaga. A o fea la seleni na avatu ia i latou ia, e leai se mea. Na ona avatu lava tufa, lau Afioga i le Fofoga Fetalai. Sa aumai seleni a le Malo ma faaoga lelei. Ae faapefea outou ia na avatu i ai, e le iloa po o fea o i ai, po o le taga a ai na alu i ai.

Lau Afioga i le Fofoga Fetalai, o le tulaga lena, mo mea o seleni nei, na ala ona aumai e le Malo, e fesoasonai ai e uunai ai Itu Faapatī, i totonu o le Palemene lenei. O le naunau o le Malo ina ia faatu ni pati ina ia aua ai ne i faalagolago i le aufaipisinisi. E leaga e fai lava si maoae o le aafia o faigamalo, pe afai e lilifa i faipisinisi. O lea foi ou te iloa, o lea foi e alu a outou suegatupe i isi ekalesia i faifeau, o le a la le mea lea ua tupu? O lea la ua aumai tupe a faifeau ia outou, o le a la le uiga o ia mea? Pe a outou tulai mai, o le a outou faalogo tasi lava i lea ekalesia, e oo lava i tupe a faifeau na avatu e fai ai alofa, o lea ua outou o lepopoi i ai, e aumai e faaoga i mea faapolokiki. Se ou te ofo, ou te ofo i ia ituaiga tofa.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ua leva ona tulai mai le HRPP, 41 tausaga na te le i faia lea mea, aisea? E ava i ekalesia ma o latou taitai, ae ou te ofo i le tou le popoi ma outou o fai ia mea. Aemaise ua oo lava i Malo mai fafo o fai i ai lo outou le mafaufau.

Lau Afioga i le Fofoga Fetalai, o le matua mataga o nei mea tou te faia. Lau Afioga i le Fofoga Fetalai, ua aoga lou tulai mai, o lea ua ou tulai atu ai e faamatala atu. Olo, o oe le isi tagata ua lauiloa i le mea lea o le milomilo upu. See mai i totonu i le moa o le ala.

Susuga Hon Laauli Polataivao Leuatea: Lau Afioga i le Fofoga Fetalai... le upu lea faamolemole, leaga o lea e tau o au sa ou teutupe. O Faumuina Liuga e saina i le tusitupe ma Tuilaepa ma Niko Lee Hang. Ou te le i teutupe, e pau lau galuega sa fai, sa fai uma mea na feilafi ai o i Petesa. That was my job. O oe sa e teutupe, o oe sa e faasoa tupe.

SUI FOFOGA FETALAI: Malie Laauli se i tuu le avanoa i le sui mo Salega, leaga o lea... ua manino foi lea vaega. Saunoa le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga, o taimi uma lava na ou fesili atu ai i le susuga ia Papalii Lee Hang. O le a le mea na e tuua ai i o i le tama le la ua faaletonu ai le tatou tulaga tau tupe. Ae fai mai, na ou manao lava e take over, ae ua ou inoino i ai, e aumai e leai ni lisiti ma ni faamatalaga o tupe e alu. Lau Afioga i le Fofoga Fetalai, o le tulaga lena, e faapefea ona e pepelo i i, o lea e tilotilo uma atu le Vaega.

Susuga Hon Laauli Polataivao Leuatea: Tuilaepa, se i tau pepelo fuafua. O lea e faalogologo le atunuu, pepelo fuafua. O la e faafofoga le atunuu, na ou tago anafea i ni tupe? Aua e te olegia le atunuu i au upu pepelo... fai fuafua mea ia

SUI FOFOGA FETALAI: Malie sui o lo o saunoa...ua tatau ona faamuta le mataupu lea. Afai lava e tulai mai, e ave foi le avanoa i le Malo, e tatau ona faamanino vala ia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai le upu foi lele, e tiga le mea sa'o. O lou tu so o mai ma lou ita ua atili talitonuina ai upu ia ou te tautala atu ai.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

SUI FOFOGA FETALAI: Ia malie Laauli o le a faamuta le mataupu lea...

Susuga Hon Laauli Polataivao Leuatea: Lau Afioga, ia faamasino le atunuu... Faamuta... lau Afioga, ia faamuta la le Palemia. Ia faamuta le Palemia leaga e pepelo ana upu ia e fai mai. A sutesue mai nei ma aumai faamaumauga mai o, po o ai lea e teutupe i le HRPP, ou te le i teutupe, o Papalii Niko Lee Hang mulimuli nei ma Faumuina Liuga lea, e sese upu ia, e pepelo.

SUI FOFOGA FETALAI: O lea ua maua, ia faafetai, alala mai lalo.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, leaga o lea ua taua lou igoa.

SUI FOFOGA FETALAI: Se malie, o lea ua ou faamutaina le mataupu lea. E lelei foi ona ou toe oo i le tulaga o tatou Tulafono Tumau 82(3), e le faauilavea le isi sui usufono i le faamalamalamaga a le isi sui usufono. Malie Olo ua toso le tatou mataupu e le sui o Salega, ae lelei ona agai tonu la outou faauilavea i le sui o lo o lauga i lenei taeao. Ae malie e le tatau ona e faalavelavea i le saunoaga faamanino o le mataupu lea e le Taitai o le Maota.

Tofa Olo Fiti Afoa Vaai: E leai ua le uma lau faafetai, i le Afioga i le Minisita Lagolago, o lea ua faafetai mai, ua faafofoga foi Samoa, i le tatou motu la ua i ai le tatou NPF. O le aoga foi lena o le Itu Agai i lena taimi, o le fagufagu atu ma le faamanatu i le tatou Malo. Se ua mamao tele foi Tuasivi...

SUI FOFOGA FETALAI: Malie le sui usufono mo Salega o lea ua maua. Afai o lea e agai mai i le saunoaga a le Malo,

Tofa Olo Fiti Afoa Vaai: E leai, o lea ou te agai i... aua o lea foi sa saunoa i le NPF ma le ...O lea foi o le a aumai i i, i Salelologa le tatou fale faamasino. O le tuualalo foi lena a le Itu Agai, ina ia faafaigofie mea uma. Ae ou te auai i le Afioga i le Palemia, o lo o faaoga lelei a latou tupe ia ua avatu ai, ae misi matou e toa-tolu ia ma si toaina o Aeau...

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

SUI FOFOGA FETALAI: Malie le sui usufono o saunoa, o lea ua uma ona faamanino atu. O lea lava e fai ma e tata i le isi itu.

Tofa Olo Fiti Afoa Vaai: O lea faatoa ave le financial statement i le masina na tea nei. Lea sa galue ai le Palemia....40 tausaga, e leai ni mea faapena na faia.

SUI FOFOGA FETALAI: Ia malie le sui usufono o saunoa, alala mai i lalo. Ua ou faamutaina le mataupu lea, o le a toa ai i i le galuega a le Maota mo lenei aso, o le mea lea, malilie sui o lo o fia tutulai mai. O lea o le a faagata i i le Maota lea.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, leaga o le mea e tataua ona faamalamalama ma faasao. E sao le Afioga i le Palemia, o le taimi sa ou teutupe ai, e 10 tausaga sa ou teutupe ai i le HRPP. Ma o na tausaga, e leai se tausaga na aveesea ai lipoti faale-tupe. E tuuina atu lau faamavaega i le tofi teutupe, o tele le tupe o i totonu o le matou accounts. Ua uma foi ona fai lipoti. Ae ua ou te i i le toe fai mai o le Afioga i le Palemia ma le Teutupe sa fuafua na te tauaveina, o la e overdrawn le account. Ona ou fai atu lea, na avatu lelei lava le account o la e tele tupe. Ua le iloa la e au po o ai lea ua...a o le fofoga la o le...aue e i ai foi le taimi na tauanau ai au e Laauli, e fai le matou pa, e faalelei le pa. Ona ou fai atu lea, se i ave i totonu o le tatou faafaletui, e talanoa ai, leaga e taugata. O le mea la lea ou te fai atu ai, na tuuina atu le tupe e au, i le Taitai ma le Teutupe ua filifilia, o tele tupe i totonu o le account. Ma le faaaloalo lava.

SUI FOFOGA FETALAI: E masalo o lea ua manino le vala lea.

Afioga Tafua Maluelue Tafua (Aleipata Itupa i Lalo): E pupuu lava si au mataupu. O lea ua manino lau Afioga... faafetai foi i lenei taeao fou, e faalogologo atu lava ua tau siisii finagalo o le tatou Fono. Ae ua ou tulai atu ma le agaga faaaloalo, se malie lau Afioga i le Fofoga Fetalai, e tuu mataupu a le HPRR, se i fono le tatou... ona tatou talanoa ai lea. A o lea o le a aumai i luma o le Palemene o faafofoga le atunuu. Ma le faaaloalo.

SUI FOFOGA FETALAI: Ua maea ona avatua, le faaiuga o le mataupu lenei. malie sui usufono o lo o taumafai e tutulai mai.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Fuimaono Teo Samuelu Teo (Falealili Sasae): E le o le mataupu lea lau Afioga, faamolemole sina mea laititi lava.

SUI FOFOGA FETALAI: Tulai mai le sui usufono.

Afioga Fuimaono Teo Samuelu Teo: E ia te au le ava e tulai atu ai, e talitonu foi lenei taeao, o lo o faafofoga tapuai le atunuu. Ae ou te talitonu foi, e ala ona toso mataupu ma oo atu ai i se isi tulaga e le o se mataupu talanoaina. O le le mulimulitaia o tatou Tulafono Tumau. O le Vaega 82(1)(2)(3), seivagana se mea e fia faasao i le saunoaga a le ua tulai. E le mafai foi ona faauilavea se isi sui i se mea ua faasao e se isi sui i lana saunoaga. Ae agai tonu lava i le saunoaga a le o lo o saunoa, po o se mea o fia faamalamalama, po o se mea o fia faasao. O le ala lena o le toso o tatou mataupu nei. Na o le tuualalo, faamolemole, tatou Tulafono Tumau, e matau ma le totoa, o le faatagaga e aumai i lau Afioga i le Nofoa. A o lea e matau o matou sui, a tulai ifo lava le tagata e saunoa, e tusa lava pe le avea i ai le faatagaga, e alu lava, a o lea e faafofoga Samoa, ma le agaga faaloalo.

SUI FOFOGA FETALAI: Masalo o lea ua toe taua le vaega lea i tatou Tulafono Tumau. O le ala lea o lou taumafai atu, o lo o taoto lava a tatou Tulafono Tumau, e taialaina ai felafolafoaiga a le Maota lenei. E ui i lea, o le mafuaaga o le taua o suafa, o le ala lea o le alu loa. A o le agaga lava ia e le tatau ona faauilavea se sui usufono i se faauilavea a se isi sui usufono, e agai sao lava i le lauga autu o le aso.

Ia se i tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Ia faafetai i lau Afioga i le Fofoga Fetalai, o le a ua ou tulai atu e faaiu ia lea mea. Aua o lau faasaoga o lea e agai i le sui sa saunoa, a o le agai mai fua o latou, ou te le tio foi la, ona e 3 aso o faamalamalama, lea sa fai le tatou semina i Tulafono Tumau, o lea la e malamalama uma lava le vaega lenei i Tulafono Tumau. O le ala foi lena o lea e tau fesoasoani atu ai i lau galuega, ae le i auai le vaega lea, i le faamalamalama o Tulafono Tumau. E na o le isi na sau, lea e le o nofo mai i i, na o le 2 ea itula na i ai pe na o le tasi ea ae toe alu ese. O le mea la lea o lea e tupu nei i totonu, o le tutulai ae o isi, e matua le malamalama i Tulafono Tumau, ae o le mea lea e toso ai.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ua fiu foi lau Afioga e te faasao mai, ae le mafai lava le tutulai sese ae. A o lau faasaoga ma faamalamalama o lea sa ave i i, i le sui o saunoa nei. A o le tutulai mai o isi sui usufono, o le mea la lena o lea ua talatala atu ai i tua le tatou mataupu, ma atagia atu ai ma le tele o nei mau mea faaletonu ua tulai mai. Ae sao lelei lou finagalo.

SUI FOFOGA FETALAI: Faafetai i lau Afioga i le Taitai o le Maota e tusa ma le saunoaga.

Susuga Hon Laauli Polataivao Leuatea: Ua lava ia lea faamolemole lau Afioga i le Fofoga Fetalai. O le a foi se upu ma se tala e faamalulu atu, tatou alo i luma la tatou Fono i le aso.

SUI FOFOGA FETALAI: Faafetai. Ia tulai mai le sui mamalu o Faasaleleaga Nu 3 e faaauau lau lauga.

Afioga Hon TOFA FOLENILIO TAMA GALU: E faafetai i lau Afioga i le Fofoga Fetalai, faafetai foi mo lenei taeao. Leaga o le upu lava a le Tusi, ia maua le filemu o le Atua. O le agaga lea o le Tusi Paia i lenei taeao, ia tatou maua le filemu o le Atua, ia maua le amiotonu a le Atua, o mea lelei ia. O le mea lea, afai foi ua i ai se mea ua sasi a le lauga o lenei itumalo o Faasaleleaga Nu 3, ia faamalulu atu. Ae o le agaga lava o le faamatalaga ma le lauga, o le agaga faafetai i le Atua. O la e faafofoga le Atua. O le agaga faamalo i galuega, o lea ua faatino i Salafai po o Savaii. Aua o le mea e lelei i Upolu, o la foi ua lelei i Savaii. Ia o le a faagasolo pea atinae i Salelologa, faafetai mo atinae lelei, o le isi vaega lea o le tatou malaevaalele i Maota. O Salelologa uta, o le la e i ai le malaevaalele ua leva ona i ai, mai lava i le taimi o Tofilau...

SUI FOFOGA FETALAI: Ia malie le sui o saunoa. E le o toe umi foi le saunoaga a le sui mamalu mai Faasaleleaga Nu 3. Tulai mai po o le a se mea o...

Afioga Hon Faumuina Tiatia Faaolatane Liuga: A o le i see ese le sui mamalu po o le Minisita Lagolago o le Soifua Maloloina. O Salelologa, o le taulaga lea i le taimi sa ou Minisita ai i Galuega, sa saunoa ai le Afioga i le Palemia.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le tau ua faatino uma ai i le faiga o le taulaga fou i Salelologa, e \$600 miliona. Ae manaia pe a amatamata malie, i le faiga o auala ma vaai pe mafai ona sii le maketi mai le nofoaga sa i ai i le nofoaga fou o lo o i ai nei. Sa tele foi ni lafoga na lafo i ai, faapea ua ave le maketi tu i le togavao, o le a le mea lea ua aliali mai. O lea ua aliali mai le faataua o le atinae ma le tamaoaiga mo le motu tele i Salafai. Ma o le tulaga lea e i ai, o lea foi e i ai se tasi o tamalii, e sili ona gaugau ai i le faiga o auala i le 100 eka muamua. Ae faafetai atu i le sui usufono mo le laga o lea mataupu, o le taua ia o le faiga o le taulaga lea i Salelologa.

SUI FOFOGA FETALAI: Tulai mai le sui usufono o Faasaleleaga Nu 3, ua toe 1 le minute.

Afioga Hon TOFA FOLENILIO TAMA GALU: Ia faafetai i lau Afioga i le Fofoga Fetalai. O lena foi ua fesoasoani mai le uso a faipule le Afioga ia Liuga, faafetai i le Afioga ia Faumuina, o lena e sao le saunoaga, o le talanoa lava i atinae mo le motu i Salafai. Ia faafetai foi i le Minisita o vaalele, o lea ua faagaioi le tatou vaalele lea o le Samoa Airways, e tasi lea vaega taua. E faigofie mo Salafai mo femalagaaiga, o lea lava ua alu malaga a vaalele. E talitonu foi e i ai le fonu, i le amataga o lenei tausaga, na matou o mai ai, i le uafu ua tapunia le alavaa. E pei o i ina i le malaevaalele i Maota sa matou o i ai, matou nei o sui usufono mai Savaii, ma molimauina ai le sologa lelei o femalagaaiga. Faafetai foi i ia galuega lelei ua toe faaalu ai ia vaalele, faigofie lava mo femalagaaiga mo Savaii ma Upolu.

SUI FOFOGA FETALAI: Malie le sui usufono o lo o tulai mai le Taitai o le Maota.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le faaiuga na fai ai le tatou taulaga fou lea, o se faaiuga maoae tele. O le finagalo o le Taitai o le Malo, ma o le mea foi lea na agai i ai le afioaga i Salelologa. E 2872 ia eka ua malie i ai Salelologa, ma o le Afioga foi i le Taitai o le Malo, o le matai foi o Salelologa. O le a tea mai le 2,870+ eka e fai ai le taulaga. O lea la na ou faamatalaina atu, e taua tele le vaai mamao na toto ai le fatu lea. Ma ina ua toe faataoto fuafuaga ua le mafai ona maua se seleni mai fafo, ona fai ai loa lea o le iuga lea, o le a faatino faasolosolo. Ae o le a fau muamua le aai e tu ai fale.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le tulaga la ina ua tuua le malo e le Palemia, ona tulai mai ai lea o nai faafitauli i le tau faaiu. Mea manū e faigofie le mataupu lenei pe a na faapea e soifua pea le Palemia, ona o faigata ia ua tulai mai, ona fai ai loa lea o le iuga o le a toe faafoi le 2,400 eka ae o le a taofi na o le 400+ eka e faatino ai le atinae tele lea o le Taulaga. E pei la ona ou tou faafogafoga i le saunoaga a le Afioga ia Faumui, o ia lea sa gafa ma le atinae lenei. O le faaiuga na fai, ia fau muamua auala ina ia sasao auala. E le pei o le mea lea na tupu i Apia, ua fau muamua fale ae fepiopiai solo ai auala. O le eseeseega foi la ma Apia, o Apia e faataufusia le tele o le elelee, o le ala lena sa le nofoia ai le tele o vaega o Apia e le toatele, na o nai vaega e tau maualuga ai le elelee. A ua omai nei la papalagi ma le tulata mai o le ava e mafai ona afea e vaa, e le aufaipisinisi ma le au papalagi lea na latou amata nofoia elelee ia i Apia ona o le tulata i le taulaga e faigofie ona omai vaa i na onapo, o vaa faila ma taula ai i tai, ia ma vaa foi na ola i afi e ola i le koale.

Ia, o le tasi la lena mafuaaga o lea e fai ma lolovaia ai le tatou taulaga i Apia ona o le maualalo tele, na o nai futu e maualuga ai mai le sami. Lau Afioga i le Fofoga Fetalai, o le vaaiga mamao la a le Malo, e i ai le taimi i le sasa'o o auala ma atufalega o le a i ai, e sili mamao atu le matagofie o le taulaga lea i Salelologa. Masalo po o le isi 100 tausaga ua tele ina afea Salelologa e vaa tetele, aua o le a faigofie ona afea. O le tulaga foi la lea e fau muamua ai atufalega ma auala faatoa liliu mai ai loa lea i le uafu, ona o le taimi nei o la e gafatia lava e vaa ona taula i le uafu o i ai nei.

Ua ala ona ou taua le itu lea ona o le taua i le itu mo le agai i le lumanai. O le ala foi la lena o lea e avelua ai ma Asau, ona e i ai le eseeseega. O Asau, o le matua tele o le loloto. E leai se tulaga e faigata ai le feliuai o vaa, e tele foi le ogasami mo le feliuai o Vaa tetele. O le ala foi la lena e tataua ona talepe ai le ava i Asau, e le mafai ona talepea i ni fana i'a. E le mafai e fana i'a ona tui le papa sosolo o i ai e matua pei o se uamea. Na pau lava la le ituaiga metotia e fai ai, o le metotia o le aati e masini tetele o le amu ma papa sosolo, ona mafai loa lea ona faalautele ma faaloloto le ava e tatai mai ai vaa turisi i totonu o le taulaga vaa. O Savaii o lo o tele nofoaga e fiafia turisi e fia matamata ai. E tele la le lumanai o le itu atu le la i sisifo o Savaii i tulaga o le afea gofie. O lona uiga, a oo foi la ina fau se fau vaa o le Pasefika atoa, e ono talafeagai lelei i ina mo atinae a le Malo i le lumanai, ona e loloto tele le ava, e le tau faalolotoa i totonu lava o le taulaga i le mea e taula ai vaa, ae vagana la le ava e ofi mai ai vaa i totonu e fai i ai se galuega.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le faigata lena o lea sa vaavaai i ai tatou inisinia i le Nofoaiga lea 1970 i le 1972 i le taimi o Tupua Tamasese Lealofi IV, sa fai ai foi suesuega e i latou o Marine Engineers. O inisinia tonu lava ia o mea tau gataifale, lea la na fautuaina Vaiusu, o le port lea mo le lumanai o Samoa ma le lumanai o le Pasefika. Ma o le taimi lenei, a fau le Uafu i Vaiusu, o le a tele ai ni galuega e maua ai, aua e mafai loa ona avefa ma laumua, o le toaiga lea o vaa e omai i le Pasefika, ona tufatufa atu ai lea i isi atunuu.

Pe a tilotilo i talatuu o Samoa ina faatoa omai papalagi i le Pasefika, o iinei i Apia le taulaga, o Vaa uma nei lau oloa e le o Fiti, e le o Toga foi, a o nei i Apia sa toai mai i ai le tele o vaa tetele mai sasae ma sisifo, aemaise lava la mai Europa ma Amerika. O iinei la i Apia, ma si tamai taulaga lea i Tutuila i na ona po na afea e le tele o vaa. Ae talu ai ona o le loloto tele o Tutuila, lea la pei sa tele ina agai i ai vaa i isi taimi, a o iinei lava le center o iinei i Apia. O lona uiga, e le mafai lava ona aveesea le mea lea, aua i le tulaga sao lava, o Upolu, e i le ogatotonu tonu i le malaga mai Amerika ma Niu Sila.

A tilotilo i le alavaa tau vaalele lea e sau mai Amerika e alu i Niu Sila ma Ausetalia, e lele tonu mai lava i luga ae o tatou, e le o Fiti. O Fiti pei e faatata agai i le itu i sisifo. O le ala lena lau Afioga i le Fofoga Fetalai, e i ai po tou te faalogoina ai le uu o vaalele, o lea e lele sao mai lava i Amerika agai i Niu Sila, ona o tatou lea e pasi mai ai, o le ogatotonu lea o le Pasefika. O mea ia e le o malamalama i ai le toatele.

Lau Afioga i le Fofoga Fetalai, o le ala la lena o lea na ala ai ona faataoto fuafuaga ia a le tatou Malo mo Savaii faapea foi ma Upolu nei. E tulaga ese Savaii, ona o Savaii e tele tele le eleele la le e i ai. O le ala foi la lena o lea e lilifa i ai galuega tetele ia, ina ia atiae Savaii. E ui ina tau lemu le alu i le taimi lenei, ae ou te lagona, o le tulaga lena, a tulai mai nei i i Salelologa, i le isi 100 tausaga, e matua tetele fale e tu ai i i Salelologa, faatasi foi ma le uafu, faapena foi ma le atinae o i Asau.

Lau Afioga i le Fofoga Fetalai, o vaaiga mamao ia o lea e vaai i ai lo tatou Malo. E le o vaai i le tulaga lata mai. O le ala lea ua toe faafoi uma ai eleele ia e 2,400 ia Salelologa. Tasi la lena mataupu o lea ou te faalogo atu o lo o fai pea ma toa i tulaga foi o le afioaga, ona ua i ai eleele ua toe faafoi ua nonofo isi ma lisi ma faatau, a o eleele o eleele faaleaganuu, e aia uma i ai lea nuu ma lea nuu ma lea nuu. Na aumai loa i le Malo ona avefa loa lea o eleele o le Malo, ae ina ua toe faafoi, na pasia lava le Tulafono na aumai ai iinei i le Palemene, o eleele na aumai e le Malo e 2,400 o le a toe faafoi ia Salelologa i le tulaga o fanua lava faaleaganuu.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O nai faafitauli la na o lea e taoto ai nei, o lea foi e i ai faamasinoga, e i ai tagata ua o faatau, a o eleele o eleele faaleaganuu. O le ala foi la lena o lea e naunau mai ai isi pe mafai ona faamaoti eleele ia, o eleele tumaoti. O le upu a le Loia Sili, e le mafai e faigata tele, leaga o mea na o lea e i totonu o le Faavae o le Malo o Samoa.

E tulai mai la Salelologa i le lumanai o le a matua tele le atinae, e sasa’o atufalega, o lea foi ua i ai atinae tetele aemaise aoga. O le tulaga foi o le tatou Malo i aoaoga ia, o lena e lisi atu i ai i le tai 100 tausaga i le na o le \$10 i le tausaga. Na o se mea e faailo ai, o eleele ia o eleele o le Malo i te i foi ua liliu atu ua faatautui e se isi ulu aoga po o se isi Ekalesia. Ae na o le \$10 i le tausaga. E tusa la o lea ua foai atu e fai ai nei aoga tele a le Katoliko e aoaoina ai fanau a Puleono i Salafai, ia, o lea foi ua i ai ma aoga, aoga tau Trades, lea foi la e aoao ai latou i tomiai ia faa-kamuta ma faa-inisia, fai taavale. O lea foi la ua faatu ai ma le aoga lea a le EFKS. I lau lava matau, e leai se mea o le a fai ai fua nisi aoga, e le o taitai tumu le aoga lea a le Don Bosco, ona o latou lava ia, o la e faagaioi e faiaoga ua tele lo latou tomiai i le faagaioiga o aoga ia.

A o le tulaga la lena i fuafuaga mamao a lo tatou Malo, o lea e fai faasolosolo. La le ua fausia Ofisa a le NPF. I le Nofoaiga lea o le a sosoo atu nei, o le a toe faasolosolo atu isi Ofisa, ma o i i Salelologa, e leai se mea e ese ai ma Apia, e tatau lava ona tutu uma ai i i le tulaga o tautua eseese a le Malo. A e sau i Aleipata, sau i inei i Apia, faigofie ona e alu i le falemai. A e sau mai o i Falelatai tu i Apia, e faigofie ona e alu i le falemai. A o o la i Savaii i le tu i o i Tuasivi o le Ofisa o Leoleo ma le Falemai, a e sau la i le isi itu i totonu o Salelologa, e te toe oso i le taavale e te toe alu ai i o. E tele le tupe, tele le mea felauai. E oo foi la i se kolisi o le Malo maualuga, o i foi e tatau ona tu ai e agai atu i le lumanai.

Lau Afioga i le Fofoga Fetalai, e le o ni mea itiiti ia e mafaufai i ai le HRPP ma faataoto, o mea o fuafuaga kukua, o fuafuaga e aoga mo a tatou fanau nei, ma e lua.

Lau Afioga i le Fofoga Fetalai, o le ala lena lea ua ou tulai atu ai ina ia faataua e le gata o le tatou motu nei, e faataua foi i le motu i Savaii i Salafai le tele o le fuafuaga lea sa faataoto mai, ma o lo o faagasolosolo pea. Upu e ave i le Malo tele lenei o Roma, e le i fausia Roma i se aso e tasi. Sa fai faasolosolo, na oo lava ina ia pulea le lalolagi atoa. E le o tatou la e i ai ni malosi faapena, pau lava le mea taua, fai faasolosolo ina ia oo atu i le isi 100 tausaga lea o lumanai, ua matua maualuga le atinae ua i ai Samoa.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Lau Afioga i le Fofoga Fetalai, o le faamaninoga lea o le atinae tele lena, ona e tetele fuafuaga mamao o lea na faataoto mai e le Malo, o lea lava e faagasolo faasolosolo.

SUI FOFOGA FETALAI: Malo faafetai i le saunoaga a lau Afioga i le Taitai o le Malo, o la e ua faafofoga mai foi le motu tele i Salafai, e momoli atu le faamalo ma le faafetai i fuafuaga alualu mamao.

Ou te tapa le sui usufono mo Faasaleleaga Nu.3, faamea mai ua maea lou taimi faamolemole.

Afioga TOFA FOLENI LIO TAMA GALU: Ia, faafetai. Faafetai i lau Afioga i le Fofoga Fetalai. Ou te iloa o lea ua manino le faamatalaga a le Taitai o le Malo i le motu tele i Salafai aua nei atinae. O le agaga faafetai lena, faafetai tele mo nei fuafuaga mamao ma atinae o lea ua faagasolo nei.

Ae i ai nai talosaga ia e fia momoli atu i le tatou Malo, o lea ua agia le auala sima lea i Lano, faapea foi le auala sima po o auala laupapa i Sapapalii, ia ona o mea lava nei o vaitafe pe a pa mai. Ae i ai la nai talosaga e 2, se isi auala sima mo le matou nuu lea i Saipipi. E le galo i le lologa lea na tupu nei i le amataga o le tausaga lea sa aafia ai Apia ma Upolu, o le tele ia o faaletonu o si o matou nuu i Saipipi, aua leaga o le vai lea e sau mai uta i Tapueleele ma Patamea, e aafia uma ai le itu lea o Amoa. E pei lava o le upu foi lea, “E a ulu tafeaga ae selefutia Vaisigano.” O le mea lena o lo o tupu nei i le itu Amoa ma Faasaleleaga, ia o le vai lea ona e loloto ni vanu o lo o i uta. Ia, o si o matou nuu i Saipipi vae atu le paia o le Maota, na lolovaia atoa le malae i totonu o le nuu, ua le sao ni taavale, le feoai tagata i le alatele, ona ua alu atu le vai taofi mai e le taligalu, ia pei o le tulaga matautia lena sa i ai. O le mea na fai, a na le o atu masini solofa i tai le taligalu ma talepe, tulou, faatoa mafai ai ona aluese atu le vai ma alu atu i le sami. O le mea la lea, e talosaga lava se auala sima lea i le matou nuu lea o Saipipi, e faapena foi Tapueleele. Ou te iloa o la e faaalua le galuega tele lela i Vaiaata ma... Tasi lea nofoaga e taua foi, ou te iloa a maea le auala, ia ua liliu mai loa fai se auala sima, ona o nai aoga na e i ai.

SUI FOFOGA FETALAI: Malie le sui usufono, e alofa mai foi i le Nofoa ma lana galuega, ua maea ona ou faailoa atu, ae faamaea mai loa, o lena lava e te agai lava i nai isi mea, o lea lava e tele avanoa i tua. O lea lava e faamaumau e le Afioga i le Minisita o Galuega mea uma, a o le agaga lena.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga TOFA FOLENI LIO TAMA GALU: Faafetai. Faafetai i lau Afioga i le Fofoga Fetalai, ia, ua toetoe lava ina a uma le tapenaga a lenei itumalo.

Ona ou oo atu lea i le Matagaluega lea o le Soifua Maloloina, lea matou te...

Afioga Alaiasa Muagututi’a Moefaauouo Malagaitutogiaia Sepulona Moananu (Anoamaa Sasae): Lau Afioga i le Fofoga Fetalai, pe maua se avanoa faamolemole.

SUI FOFOGA FETALAI: Ia, le sui usufono mo Anoamaa Sasae.

Afioga Alaiasa Muagututi’a Moefaauouo Malagaitutogiaia Sepulona Moananu: Leai, talu ai e le o toe na ma le laina o tatou lauga mulimuli nei a nai sui usufono. O lea lava pei ou te talosagaina se faaopoopoga, o lea foi sa saunoa le Tama Fofoga Fetalai, e i ai taimi lavea foi nei i mea o taaloga. Ia, *Pe maua se taimi lavea o si Toeaina e faauma ai lana lauga.*

Ma le agaga faaaloalo.

SUI FOFOGA FETALAI: Faafetai. O lea ua i ai le talosaga ma ua foliga e... Ia, a o lea foi ua oo i le tatou taimi malolo, o le mea lea o lea e tuu atu ai lava le avanoa e faamaea mai ai ua fia fai foi se malologa a le Maota. Ae faamaea mai le sui usufono mamalu mo Faasaleleaga Nu.3.

Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Lau Afioga i le Fofoga Fetalai pe maua se avanoa...

E leai, ou te tulai atu e lagolagoina le lafo faatu a le Afioga ia Alaiasa, ona e matauina foi o le isi vaega tele o le faamoemoe o le sui usufono o lea e le i oo i si ona itumalo. E pei o le ala lea o le toe tatalo atu i lau Afioga mo le sui usufono mamalu o lo o saunoa. Faafetai.

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo.

SUI FOFOGA FETALAI: Ia, o lea ua faalua le lafo. E le mafai foi ona taofia e le Nofoa tulaga o taualumaga o le tatou Fonotaga e ao ona tuuina atu le fesili.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ma o lea ua saunoa le sui usufono mamalu o lo o saunoa, ua maea toe lava o ni nai... ia, ona maea lea. E ui o lea, a o lea foi ua toe faatu mai le lafo. E ui o lea, ne i avea ma lape o le Nofoa.

Na tuuina atu le maliega autasi a le Maota i le lafo.

SUI FOFOGA FETALAI: Talu ai o lea ua tatou taunuu i le tatou malologa masani o le taeao, o lea foi ua talia le toe faaopoopo o le isi foi 2 minute o le sui usufono o lo o saunoa ona e le i oo i lona itumalo, o lea ua manatu ai o le a faataatiaese Galuega a le Maota mo lana malologa masani e 15 minute. Faafetai.

Na faataatiaese Taualumaga a le Fono Aoaio Faitulafono mo lana malologa masani i le itula e 10:45 i le taeao ma toe faaauau i le itula e 11:35 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

SUI FOFOGA FETALAI: Ou te faasilasila atu ua toe amatalia nei Taualumaga o le Fono Aoaio Faitulafono.

Ou te manatu o lea ua maua foi se faasiliga malosi e le paia o sui usufono mamalu uma o le Palemene aua le faaauauina o le tatou galuega i lenei foi taeao, ua maua foi se ea fou ma se malosi fou e pei ona i ai i le taimi ua sola.

E faataatiaese Galuega a le Maota o faaauau le saunoaga a le sui usufono mamalu mai Faasaleleaga Nu.3. O le mea lea ou te tapa le sui usufono mamalu e faaauau lau saunoaga.

Afioga TOFA FOLENI LIO TAMA GALU: E momoli le faafetai i lau Afioga i le Fofoga Fetalai o le Maota, aua le avanoa o lenei itumalo e faaauau ai pea se lauga, aemaise foi tulaga e pei ona i ai. O lea ua palega auau le taliga o le sua, e talitonu foi ua maua se faasiliga malosi e lau Afioga i le Taitai o le Malo ma le Kapeneta, aemaise le mamalu o sui usufono i lenei taeao ma le Malo. Faafetai i le Ofisa.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae momoli atu foi le faafetai i le lagolagoina foi o le lauga a lenei itumalo. Ia, e tele lava nai mea ia o lo o totoe, ae usitai lava i lau Afioga. Afai ae maua se avanoa ia ua le o toe umi foi, ae faafetai mo le avanoa.

Ona ou oo mai lea i lou itumalo. Ia, e faatalofa atu i le itumalo aua la outou tapuaiga, aemaise o le afioaga lea i Faga, mai Siufaga i Salimu, e faatalofa atu i le afifio o le Toaono o alii o Faga, lau Afioga Unasa ma lo outou aiga, lau Afioga Nonumalo ma lo outou aiga, lau Afioga Lefinealii ma lo outou aiga, faapea foi lau Afioga Toala ma lo outou aiga Sa Toala, afio o Sooaemalalagi ma lo outou aiga, afio foi Ufagalilo ma lo outou aiga. O paia na o le Toaono o alii o Faga. Faamalo tapuai, malo foi tatalo.

E faafeiloai atu foi i le afifio o le Aiga Taulagi, Afioga Vaafusuaga ma Toleafoa, faapea foi le alaalatai o lo outou Toafa o Tulafale, lau fetalaiga Pini ma Vaisau, lau fetalaiga Laufiso ma Tapuala, ia leaga o outou lava e faia upu o le tatou nuu. Ia, malo le tapuaiga.

Alaalatai foi tagata matutua, lau fetalaiga Tuileutu ma lo outou aiga. Ia, leaga o oe Tuileutu sa e seei foi i le nofoa o lenei Palemene, o lea foi ua faapaleina oe i le tofi Tiakono Toeaina o le Matagaluega a Faasaleleaga, malo galue, malo foi tapuai. Le mamalu i le Faleaana ma Salemuliaga, ia, o le agaga faamalo i la outou tapuaiga ma lo outou tatalo. E le galo foi le tapuaiga a tatou ositulaga, faafeagaiga ma aiga ma Ekalesia, faafetai tatalo, faafetai foi le talosia o le Faigamalo ma ana feau, o lea lava o lo o manuia.

Ou te talitonu e le o toe po se lilo i lena masina sa tatalaina ai o tatou auala, o auala lava mai Sapini, Luua, Salimu, e tele nei galuega, o ni galuega tetele ua faatino e le tatou Malo i lo tatou nuu i Faga. Amuia tatou ua faatino ai nei galuega. O le mea lea, faafetai i le Malo i le Afioga i le Taitai faapea foi lau Afioga i le Minisita mo Galuega Tetele ma le Matagaluega, ua tele nei galuega taua, e le gata la i auala, a o le taligalu ma e faasolo atu, alu atu lava i i i Tuasivi, lale ua pai atu i Luua ma Salimu. Ia, faafetai. Faafetai i le Malo mo nei galuega, o lea lava e matauina, o mea lava nei sa lauga ai lo outou sui usufono i le amataga. Leaga o tatou i le Faasaleleaga Nu.3 e aafia i le galu, aafia i le sami, o lologa, o tsunami, ae faafetai o lea ua i ai auala galue, aemaise le agai i uta e fau maota ma laoa, ia o tulaga na o lea ua i ai. O le mea lea, faafetai tapuai, faamalo i la outou lagolago i le Malo, o lea lava e faia e le tatou Malo mea sili. O le mea lea, o le agaga lena.

Ona oo mai lea i le tatou afioaga i Saasaai, aua le afio o le Taulagi ma...

SUI FOFOGA FETALAI: Malie le sui usufono o lo o saunoa, se i tulai mai le Taitai o le Maota.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e leai se agaga e faalavefau o folau le vaatele aua le saunoaga a le sui usufono. O lau matau o lo o tau faaiuiu.

Ae ua ou tulai atu lau Afioga, ona e i ai le feiloaiga taua lava a Taitai o le Pasefika ua toe 15 minute ona usuia lea. O le fonotaga lenei ua le mafai ona usu i se tulaga o le faafeagai o segaula, ae ua faaoga ai fesootaiga televavave, ma e ogaoga mataupu o le a faatalanoaina, aemaise lava le tulaga lea o le faamai oti lenei o le Koviti-19. Ua tatou agai atu nei i le faatalanoaina o auala e amata ai ona faagasolo le tufatufaina mai o tui i le faasoa, aemaise tulaga foi i le filifiliga e tatau ona fai ona e 232 le tele o ituaiga tui eseese o lo o i ai. E eseese lava atunuu o lo o faia ai sutesuga, ma e tele lava le filifiliga e tatau ona fai. E i ai le vaega seiloga e faamalulu i le malulu e oo i le 70 tikeri e pau ifo ai i lalo ifo o le zero (0). E i ai le ituaiga e na o le 2 i le 8 tikeri le malulu, o le vaega la lena e tau ogatasi ma le tatou mafanafana, o agai i ai le tatou filifiliga. A o mataupu na o lea e faatalanoaina nei, i nai minute ona amata lea o le fonotaga.

E ogaoga mataupu o le a talanoaina mo le tulaga au i luma o le tatou atunuu i le fofō o le faamai oti o lo o aafia uma ai le Pasefika. Ma ua faafogafoga foi o lea ua amata ona faagasolo tui o isi atunuu o le Pasefika e 18 o le Forum aemaise lava latou o lo o i lalo o le vaaiga a Amerika ma Farani. Ae e i ai le vaega o lo o i ai lava le faaeteetega, e i ai la tatou i le taimi lenei, o lo o mataitu aafia, e pei foi ona silafia, e i ai tatou tui e titina ai isi faamai e pei o le polio, e tele lava o tatou tagata na uma ane ua pipili. A o le tulaga lena o le faaeteetega o lo o i ai, ina ia matua saogalemu tui nei. E le gata la i le faagasologa, e le gata ai i ina.

O le isi tulaga faigata, o le uma o le tui ae toe tulituliloa i latou na tui po o le a ni aūga o lo o vaaia. O lona uiga, i tua atu o le tui, e faaauau pea puipuiga nei, puipuiga o le nofo valavala, puipuiga o le fufuluina o lima a o le i faia taumafataga ma le pupuni o fofoga. E faaauau pea le tulaga lena mo sina vaitaimi. E tele mataupu o le a talanoaina.

Ae o lou tulai atu e faanoi i lau Afioga, o ala ia o mea o le faanoi atu a o lea e faafogafoga, o le a ou tuua lou nofoa, ae a silasila mai, o lea e auai uma le Kapeneta, o se Kapeneta e matua aloaia tulaga masani o tatou Tulafono Tumau.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le ala lea ua ou tulai atu ai, e faalauiloa aloaia ma tapa foi lau faatagaga, ona na o lau Afioga e sau ai le faatagaga o matou. Ona tuua ai lea o matou nofoa ma ou toese atu ona o nei foi tiute e pei ona tatou faalogo ai, i taimi foi a o faafoe e le tofa ia Lavea Levi le 2AP na ia fatuina le faaupuga tuu isi mea aoga, ona o isi mea aoga.

Lau Afioga o le faanoinoi atu lena o le a tatou le auai, ae o le a ou tatalo pea, tatou te auai i felafolafoaiga i le agaga ae le o la le tino. O lau faamatalaga lena ma le ava tele, ma ou te faalalolalo atu o le a tu'u isi mea aoga, ona o isi mea aoga.

SUI FOFOGA FETALAI: Ua faamalo saunoa i lau Afioga i le Taitai o le Malo. Lau Afioga se i maea ona avatu le faamatalaga a le Nofoa.

Ua faafofoga le Maota faapea foi le Palemene, ia ma le paia o Samoa. O tulaga aloaia o le tuua o le Nofoa pe a tauaofia le Palemene. E taua tele ia taitaiga lelei o Faigamalo, aemaise le Maota lenei, o tatou o Taitai Filifilia o le atunuu. O lea ua aumai aloaia i le tulaga aloaia e tusa o tatou Tulafono Tumau, le tulaga o faanoi se i avatu se faatagaga a le Nofoa. E tuua ai isi mea lelei ae auai i nisi foi tulaga masani e pei ona i ai le Fonotaga a Taitai o le Pasefika, e taua tele. A o se laolao foi a o se avanoa e toe faamanatu ai, i le paia maualuga o sui filifila o le atunuu, tulaga o le tuua o le Nofoa e aunoa ma se faatagaga a le Nofoa. E toe avatu ai se fautuaga, o lea ua aumai e le Taitai o le Maota tulaga aloaia, ma ua i ai le faatagaga a le Nofoa. Ae peitai, e lelei foi ona ou toe faailoa i tulaga o lou nofoa e aunoa ma se faatagaga i ni tulaga aloaia. O lea ua faailoa i lenei taeao. E lelei foi ona faafofoga mai ai nisi o sui fou o le a agai mai i le Maota, ma nisi foi Pati fou. I le tulaga o le galuega faa-Palemene, e ao ona manino ma malamalama lelei i ai. E le tulai lava ma tuua le fonu a le Palemene, e ao ona seek le authority, e ao ona fesiligia muamua le faatagaga a le Nofoa. E pei lava ona ou fai atu, o au nei, a o se isi o outou taeao. Ne i mea ane ua tulai mai u mai le tua, ona faapena lea ona le amanaia le Nofoa. O le mamalu lava lea o Samoa ma le Palemene lenei. O le mea la lea, lau Afioga i le Palemia le Taitai o le Maota, ua tuuina atu aloaia le faatagaga a le Nofoa, e te tulai ai, ma faafetai mo mea uma. E lelei ona faataitai uma ai tatou, e leaga le uma o lauga tulai ma o, u mai le tua, e pei ni Fonotaga a tamaiti. O tulaga aloaia, ia manuia lou alo atu i le Fonotaga a Taitai o le Pasefika aua se sao o Samoa.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Susuga Hon Tuilaepa Auelua Patialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga, o uiga lava ia o le tatou Maota e pei ua avea uiga o isi, ua tau faataitai atu ai ma isi. Ia manuia tele le Fono.

SUI FOFOGA FETALAI: Ia maua sou finagalo lau Afioga aua le tapuaiga a si o tatou atunuu ma le Maota lenei.

Tofa Olo Fiti Afoa Vaai: Lau Afioga i le Fofoga Fetalai, o le faanoi foi pe maua sou avanoa, e faamanuia atu i le Fonotaga a le Afioga, ou te faafetai i lenei taeao na liugalua i le saunoaga ma le faanoi a le Afioga a le Palemia. E faafetai o lea ua uma le Paeaiga, ae faatoa fai lava lea o lana faanoi i luma i i.

SUI FOFOGA FETALAI: Faafetai Olo, e lelei foi ona ou toe faamanatu atu le Tulafono 82(4), leaga o lea e te lagalaga lava le maa, ae faitau ane le tatou Tulafono e lelei e sologa lelei ai a tatou mea. Aua ne i aapa le Fofoga Fetalai i le 92 ma le 91. E lelei ona ou faamanatu atu mea ia, o le (4) 82 seivagana pe e te faauilavea pe e te a, vagana ua avatu e le Nofoa le faatagaga. Ina ua manino ma address lelei e le Nofoa le point of order, clarification, mea uma na. Ia na ona toe faamanatu atu, ina ia aua ne i toe tulai mai i se taimi o i luma.

Ia malie le sui mamalu, se i ave muamua le avanoa i le sui usufono mo Falealili Sasae.

Afioga Fuimaono Teo Samuelu Teo: E faafetai i lau Afioga mo le avanoa. E matau lava foi ma le totoa i le faatautaiga a lau Afioga, malo faafetai. O lea lava e fai ma e tapatapa, e toetoe lava a e oo i ai i le tulaga lea o le Tulafono Tumau o le 91 ma le 92. O le tala a le faafafine, se oo i ai, oo i ai, ma le agaga faaaloalo.

SUI FOFOGA FETALAI: Ia faafetai. Ia e le faaosoosoa foi le Nofoa i ni tulaga e ono aafia ai finagalo o le tatou Palemene ma le atunuu. E fai foi o le Tulafono a o le va nonofo, le va tausii. O le mea la lea Olo faafofoga lelei mai, o lea lava ou te tausisi i le mea lea, leaga o oe o le uso. E leaga o lena ua e i Salega, ae a ta o i Saleaula, ou te le tau faamatalaina atu le mea lena.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le mea la lea, se i tausisi mai i tatou Tulafono Tumau, ina ia aua ne i afaina. E fai foi o le Tulafono, ae le mafai le Nofoa ona tuua le avafatafata ma tulaga e tatau ona taoto ai. E tetele lava pesega ae matua lava i le o o. Ioe, leaga na muai saili i le lagi, lea e afua ai le taeao lenei.

Tulai mai lau Afioga i le Minisita o Aoga pe i ai se mea o e fia saunoa ai. O lea ua ou vaai atu ua oli mai...

Afioga Hon Loau Solamalemalo Keneti Sio (Minisita mo Aoga, Taaloga ma Aganuu): Ia faafetai tele lava, e leai o lea ua manino le mata o le vai. Ia faafetai mo le avanoa.

Afioga Hon Afamasaga Lepuiai Rico Tupai: Lau Afioga i le Fofoga Fetalai, e tulai atu ma le faaaloalo, ona o lea na agiga o le taimi muamua lea ua faanoi ai le Afioga i le Palemia. A o lea e pei sa matau foi le tatou Palemene i le la vaiaso sa feagai ai ma le Fonotaga a Taitai o le atu Polenisia, o lea foi sa faanoi aloaia foi i lau Afioga i le Fofoga Fetalai, na o se mea e fia faasao, faafetai.

SUI FOFOGA FETALAI: O le lagalaga pea o manatu i le tulaga o le faafoeina o le Fonousu lenei, ua ou toe manatua ai le mea e ao ona faamanatu atu. E 2 itula e te le auai i le Fono, e tusa lava lea ma lou le auai i le Fono atoa i lona aso. O lea la ua ou faatonuina ai foi le Failautusi, e tusi lelei i lalo ia sui mamalu, e le i aumaia aloaia se faamoni, ma le tulaga lea. E leaga o lea lava e lagalaga tulaga ia, o le faanoi i le le auai i le Fono na o le laulau, e le faanoi le isi sui usufono i le isi sui usufono. O le mea la lona, na ona toe faamanatu atu, ua outou loa i le Maota, e ao lava i le Nofoa ona faatonuifolau lelei ia le tulaga, o le faatinoga o le galuega, ina ia aua ne i lape.

Ou te tapa le sui mamalu mai Faasaleleaga Nu 3, ia faasee mai loa lou sa i totonu.

Afioga TOFA FOLENI LIO TAMA GALU: Ia malo faafetai i lau Afioga i le Fofoga Fetalai. Ona o lenei lava taeao e matauina le tele o faauilavea, ioe, a o lea lava e taumafai atu, ae faafetai mo le avanoa. O lea foi ua toe faaopoopo le isi afa itula mo au, ia faafetai.

O lea ua ou oo i lou itumalo, le afioaga i Faga, o lona ua outou silasila i galuega ua faatino e lo tatou Malo. Amuia foi tatou, amuia tatou i lenei vaitau ua tele na galuega. O le mea lea e faafetai ai i le Malo aemaise o le tatou afioaga ua leva ona talosagaina nei galuega.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ona oo mai lea i le afioaga i Saasaai, aua le afio o le Taulagi, Vaafusuaga ma Toleafoa, aemaise foi o lau afioga Tea ma lo outou aiga. O oe lava o le taulagai, afio le susuga i le Maopu ma usoalii, alalatai lau fetalaiga Segi o le matua fetalai. Faapea le pule a Leuu ma Salemuliaga.

Ia faamalo i la outou tapuaiga, faafetai foi tatalo mo lo outou sui usufono. E le galo foi le Aufaigaluega paia a le Atua, o lo o nonomanu aua le manuia o le Palemene ma Samoa. Ou te iloa, o lena ua i ai galuega na ua uma ona faatino e le Malo, aemaise o tatou auala na ua i ai, o galuega lelei na sa faatino e le Paeaiga talu ai. E pau lava le mea lea e totoe, o lea lava e talosaga e toe faaopoopo i uta. Aua lava le mea lea o le vai e aafia ai tele tatou, o lea lava ua i ai talosaga ma tatou taligalu. O lea lava e faagasolo feau a le Malo, aua e tele feau, ae faafetai i la outou tapuaiga.

Ona oo mai lea i le nuu pele i Saipipi aua le afio o le aiga Taulagi. Lau afioga i le sao Tofa ma lo tatou aiga sa Tofa, susu foi le maopu o le Taulagi, lau susuga Sua, afio le alo o Vaafusuaga, lau afioga Utumapu ma usoalii. Alalatai lau tofa i le tama o le nuu, lau fetalaiga Tutuaitu Samuelu ma le mamalu o le falefitu. Ia faapea foi le alalatai o lau fetalaiga Tataufaiga, ma le mamalu i le faleupolu o tofiga ia Salemuliaga. Tainane faletua ma tausii, o saoa ma le malosi o le nuu, malo i la outou tapuaiga. E momoli lau faafetai, i faafeagaiga taulagi o le tatou nuu, faafetai i la outou tatalo, taputapu, aua le Paeaiga o lo o i ai nei ma le Faigamalo. O lea lava o le a tini le faamoemoe, o lea lava e manuia. Ou te iloa o lena ua i ai a tatou galuega na amata ai lenei Nofoaiga. O tatou auala na i Saipipi, o lea lava sa faatino i le 2016, o lea foi e i ai a tatou galuega o lea foi e fuafua mo nisi auala, ae lafo pea i le Malo ma lana faasoa.

O le isi vaega e faafetai atu ai i le Malo, o le matou faleaoga lea i Saipipi, lea ua faatino nei. O lea ua alu nei le 3 vaiaso ua amata le faleaoga fou, ia faafetai i le Malo o Iapani, le JICA, aua o lo o fesoasoani lava lenei Malo i le tele o galuega o faleaoga i afioaga. O le mea lea e faafetai i le Malo, leaga o faiga paaga ia a le Malo ma atunuu mamao ma nei Faalapotopotoga, o lea e maua ai fesoasoani, o le mea lea faafetai. E faafetai foi i lo tatou nuu o Saipipi, e talitonu o lea lava ua ou tulai e tali lo outou finagalo, ae faafetai mo la outou faaeaea, aua le aiga sa Tofa. O lea lava ua tali lo outou finagalo e pei ona i ai, ia tatou lafo i le Atua, o a filifiliga ma fuafuaga aua le faiga palota i lena masina. O le Atua lava e silafia mea uma, e faamoemoe lava i le Atua. Afai lava e toe faaoga la outou auauna, e foi lava le viiga i le Atua.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ona talanoa lea i le Matagaluega o le Soifua Maloloina, o le Matagaluega lea o lea sa tofia i ai le Afioga i le Minisita ma o matou tagata. Aua o lea sa amata i le Matagaluega o Tina ma Tamaitai, a o lea ua faaiu, ia faafetai. E o mai lava i lenei Matagaluega ma le lē iloa o se mea. Ae peitai o le Atua lava e fesoasonai, e fesoasonai le Atua i le lē iloa ma le mativa i le mafaufau, a o lea ua maua le mafaufau ma le toamalie, aua lenei galuega.

O le Ofisa o le Soifua Maloloina, e le tau fai atu, e tasi lenei Matagaluega e tele ona feau e tua i ai le atunuu. E fai mai le fuaitau lea e faalogoina pea i le leitio ma le televise. O lou soifua maloloina, o lou tamaoaiga. O lou soifua maloloina o lou tamaoaiga lea, e mafai foi ona feliuai. O lou tamaoaiga e faamoemoe i lou soifua maloloina. Your health is your wealth, e ese le manaia o nei taiala.

Le paia e o le Palemene ma Samoa, o le mea lea o lo o lalagaina nei e lenei Matagaluega, faamuamua le soifua maloloina. E toatele gasegase, a o le fautuaga a fomai ma lenei Matagaluega, faamuamua lou soifua maloloina lelei. Ia tatou usitaia fautuaga a fomai, o lea lava e aumai fautuaga, tatou lagona foi le loto maualalo e usitaia ai fautuaga aua le soifua maloloina. Aua o le taiala lava lena, o lou tamaoaiga o lou soifua maloloina lea. E maua mea uma, tupe ma mea uma o le tamaoaiga, ae a le maua le soifua maloloina lelei o le tagata tulou, e leai se uiga, e leai se uiga. Ma o le finau foi lena ma le taiala a lenei Matagaluega ia Samoa ma tulaga o i ai. O le mea lea, o le agaga lea e faailoa atu ai le taiala, ia tatou faamalolosi.

E avea foi lenei taimi, manu lava o lea e maua le avanoa e momoli atu ai lau faafetai i lau Afioga i le tamaitai Minisita, lau Afioga Faimalotoa Kika Stowers. Faafetai mo galuega, e faafetai foi mo lou valaauina o lou tuagane vaivai, ta te galulue ai i lenei galuega, o le Matagaluega o le Soifua Maloloina. Faafetai mo fautuaga, faafetai mo timaiga. O lea lava e tu i luga ma savavali, leaga o le uiga lena o le taitai. E fai mai lava upu masani, walk the talk, talk and walk. O le taua ia o ia upu, a fai o le taitai, tu i luga e savali, vaai, siaki, matau, ioe taitai lelei na, taitai na e maua ai le amiotonu ma le lelei o galuega. Talk the walk, walk and talk, o le mea lea faafetai, faafetai mo galuega i le Matagaluega.

E momoli foi lau faafetai i le Ofisa Sili o Pulega a le Matagaluega, le afioga Leausa Samau Toleafoa. E leaga o oe o le alii fomai, faafetai e tele au feau aua lenei Matagaluega tele. Ioe, tele galuega, ae faafetai le onosai, faafetai foi le lototele ia tatou feau, malo galue.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E faapena foi se faafetai i le Ofisa Sili Lagolago o le Pulega o le tatou Matagaluega o le Sofua Maloloina, aemaise nai fomai. O le po ma le ao, ao ma le po ma isi auunaga eseese, e tele auunaga ae faafetai le loto tetele. O le isi vaega e faafetai atu ai i lau Afioga i le Ofisa Sili o Pulega ma le tatou Matagaluega...

SUI FOFOGA FETALAI: Ia malie le sui usufono, faamaea mai loa le saunoaga ua maea le taimi na faaopoopo aloaia mo lau susuga.

Afioga TOFA FOLEN LIO TAMA GALU: O le vaega lea faanofoesea, e tasi lea galuega tele, o tatou tagata ua taunuu mai lea e faanofoesea i faletalimalo, e tasi lea galuega tele a le Matagaluega, o le mea lea, faafetai. E faafetai i le tatou Matagaluega o le Soifua Maloloina, galuega lelei, e i ai foi taimi e faaletonu ai, e le gata i...

SUI FOFOGA FETALAI: Ia ua e toe faalavelave lava, o lea ua faamaea mai. Ua iloa atu le sa o Faasaleleaga Nu 3 o le a faaae. Ia se i saunoa.

Afioga Alaiasa Muagututia Moefaauouo Malagaitutogiai Sepulona Moanau: E fia malamalama ai i le matagofie o le saunoaga a le sui mamalu o lo o sausaunoa nei. E lei leva foi, o au sa faatuina le lafo e faaauau lana lauga. Ae peitai ane o lea ua oo i le tulaga o le soifua maloloina, ma ua ou lagona lava le taua o le mea lea, health is your wealth, po o le sao lea le sui mamalu. E faapea ia lelei...e pei e lautele le aumaiga o le faamoemoe. Aua a ta vaai nei i nei vaitaimi aemaise foi o le tatou aga atu i faiga palota. E i ai isi au healthy lea ua feoai solo e faalavelave i tatou wealth. E pei o le mea lea, se i tuusao mai le saunoaga a le sui usufono, leaga e fai si lautele. A o lea ua tatou vaai, e solomua i si au maloloina tulaga faapena e pei ona i ai i lenei vaitau. Ma le agaga faaaloalo, e pei o si mea lea e fia malamalama ai.

SUI FOFOGA FETALAI: O le saunoaga a le sui usufono, o le faafetai lava i le galuega faatino, ae o lo o i ai lava, o lea lava tou te silasila i ai i le TV, faafofoga foi i le leitio. O lea lava e faaauau galuega a le Soifua Maloloina. O lona uiga a toe taua ma faalautele e le sui usufono nei, ia o le mea foi lea, le upu masani foi lea o le repetition. O le a le afaina lea, ae malie le sui mamalu, ia o lea ua maea lou taimi faamaea mai lau lauga faamolemole.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga TOFA FOLENI LIO TAMA GALU: Faafetai i lau Afioga i le Fofoga Fetalai, o le agaga lava lena, e faamuamua le soifua maloloina. E maua ai foi le fiafia ma le malosi, o lou tamaoaiga lava lena. O lea o le a tau faauma atu le lauga a lenei sui usufono.

O le agaga faafetai i le Matagaluega o le Soifua Maloloina. E faafetai i le vaega lea ua tofua le falemai faaitumalo ma le fomai. O iinei i Upolu o le agaga lena, o lea ua tofufufusia ma fomai. E faigofie i o tatou tagata le o ane i falemai na faaitumalo, i lo le tau o mai i Motoootua. E faapena foi i Savaii, o lena foi ua tofua lava falemai, e tele lava ina ou asiasi i falemai nei i Savaii, alu atu lava i Satupaitea, o Foailalo, o Sataua, Safotu, Vaipouli, o la ua tofufufusia i fomai, ma auunaga eseese. E pau lea o si falemai lea i Vaipouli, lau Afioga i le Fofoga Fetalai. Faafetai lava mo le tatou falemai lea faaitumalo, ua tele sona aoga. O le falemai lea, o la e vaai mai e le fomai lea e i Safotu. O Aso Gafua ma Aso Lulu, na e sau ai le fomai e vaai mai, ma gasegase foi e pei ona i ai. Ae faafetai i le tatou falemai lea, i le taimi o le misela, lea sa pipisi. O i lea sa faanofoesea ai ia alo ma fanau, o le taua lena o lenei falemai. Aua o lea e tu i uta, i le taimi lea sa i ai le Kolisi o Vaipouli, o le taua ia. O le mea lea, o a foi ni faamai e pei ona i ai faamai ia e vevesi ai le lalolagi, e taua tele le tatou falemai lea i Vaipouli.

O le agaga faafetai foi mo falemai faaitumalo i Savaii, faafetai i le pulega a alii ma faipule. A oo atu, o la lava e leoleo i le filemu, tausi le saogalemu o le aufaigaluega. O le mea lea, faafetai i le pule mamalu a alii ma faipule, le Puleono aua a tatou falemai nei. E leai o falemai lava faaitumalo, ae faamoemoe lava i pule mamalu. E tou te leoleo ma vaai ma tausi le saogalemu, aemaise o le fesoasoani i nisi o feau. O le mea lea, o le agaga faafetai lea lau Afioga, aemaise le mamalu o lenei Palemene i galuega o lo o faatino, falemai faaitumalo, falemai i Tuasivi, o le falemai sili lena o lo o faamoemoe i ai galuega uma. O lo o i ai fomai pe toa-fa i le 5, e pei o i lava i Tuasivi e faamautu i ai le tatou galuega i Salafai. O le agaga lea, e tele nisi mataupu, leaga e usitai i lau Afioga i le Fofoga Fetalai, ae faafetai mo le avanoa.

E faamulimuli so matou leo, faafetai atu i nai tama ia o le a malolo litaea se i tulou, malolo manumalo. E faafetai mo sao o nei tama, e le tau faamatala atua, faamalo galulue, amuia outou. O lea lava ua malolo manumalo, a o lea lava e galulue i lenei Palemene. O le mea lea, faafetai i nei tama, faafetai le onosai, faafetai foi le loto tetele. Atonu e tele nisi feau o lo o faamoemoe i ai le Atua mo lo outou mamalu.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ona faaii lea o se leo, lo tatou itumalo, malo le tapuai, faafetai foi mo mea uma. Ia faafetai i lau Afioga i le Fofoga Fetalai, faamanuia le Atua i lau Afioga ma lenei Palemene, manuia foi lenei aso ma le Fonousu a Samoa.

Na faaalua le agaga fiafia o le Palemene i le patipati o latou aao i le maea ai o le saunoaga a le sui usufono mo Faasaleleaga Nu 3.

Tofa Hon Lopao Natanielu Mua (Minisita o Faatoaga ma Faigafaiva): Lau Afioga i le Fofoga Fetalai...

SUI FOFOGA FETALAI: Ia se i tulai mai le Afioga i le Minisita o Faatoaga ma Faigafaiva.

Tofa Hon Lopao Natanielu Mua: Ia faafetai tele lava mo le avanoa, e fai si ou matamuli lava, ae leaga e faigata o lea ua taatia i lumamea le lafo a Lualemana, ua manino foi auofala i Tulafono e pei ona e faamalamalama. Ae ui i lea, faamalulu atu i lau Afioga [.....]

SUI FOFOGA FETALAI: Ua tau le maua foi se tali a le Nofoa. Ae ui i lea, mo le silafia e sui usufono uma, afai e le i maea mai e i ai avanoa i mea taitasi pe a oo i ai i faasologa, ae faafetai mo le lauga. Lau Afioga i le Minisita, e le tau faanoia, e le afaina lea.

Ua faafofoga le Aiga Taulagi, tapuaiga a le itumalo, malo saunoa, malo foi le tapena. Ua oo lava i ooooga le lauga o lenei taeao. Malo faafetai mo lenei Paeaiga. Ae ua avanoa foi le Palemene mo se sui usufono e fia saunoa.

Ia o lea ua logo mai le Nofoa, e le Afioga ia Faaulusau Rosa Duffy Stowers, o le sui tamaitai faipule mai le itumalo o Gagaifomauga Nu 3.

Ia malie Faaulusau se i tuu atu lava le avanoa...

Afioga Alaiasa Muagututi'a Moefaauouo Malagaitutogiai Sepulona Moananu: Lau Afioga i le Fofoga Fetalai, e tatalo atu ma le... e pei ua tau ese foi le faalogona i le mea lea na saunoa i ai le Afioga i le Minisita. Ia ona o lou tulaga faa-whippy e ala ai ona ou tulai ma le agaga faaaloalo. E pei o le a avea foi lau saunoaga i le taimi ua sola e faanoi sui usufono ma mea o le a aliali ai se isi tulaga i totonu o le tatou Maota e atagia ai e taumamaina ai le mamalu o le tatou galuega.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le mea lea ou te fautuaina foi le tatou Maota, ia tatou tausi le mamalu e faapena ona... E le toe talia ni faanoi faapea, e faapena ona, ae malo foi le toa i lau Afioga i le Fofoga Fetalai. Ia faafetai foi i lau faapalepale. Ia manuia taulumaga o le tatou Fono ma le agaga faaaloalo. Ae se i fai le fono a le HRPP, ona fai lea o le sala a le Minisita.

SUI FOFOGA FETALAI: Ia faafetai i le sui usufono mo Anoamaa Sasae mo le fesoasoani mai, o lau Afioga foi o le whippy. O le taua ia o lou finagalo, o le ala lea sa taumafai ai le Nofoa e natia, ona o le agaga le talafeagai. E matua tulaga ese lava Tulafono Tumau ma le tulaga ua aliae mai. Ae ui i lea, e le tau faatonua e le matapia le manaia. Na ou musu lava e oo tala ia, o le toeaina foi lea e nofo i le Nofoa o le toeaina o le aganuu, e mafai ona ou oo i nisi upu. A o le agaga o le tausiga o le mamalu ma le tulaga aloaia o le tatou Fonotaga lenei. O lea lava e apelepele pea ma aputiputi le tulaga mamalu o a outou Afioga. O lena ua faafofoga le Maota i tulaga aloaia o faiga faanoi. E leai, o le agaga mauuluga o le Tulafono Tumau, tuua le Maota, ma le fono. Ae le taua ai lava nisi vaega, e lelei ona manino mea ia. Na ou faapea lava au ia, ai ua manino mea uma. O le tulaga o le tuua o le Maota, mo nisi foi faamoemoega, e aofia ai le atunuu atoa, o lona uiga e le toe auai i le Fono. A o le tulaga i nisi tulaga ia ou te le toe fia tautala i ai, ou te le toe fia tautala i ai. O le mea la lea, faagata i i le mataupu lea, ia leaga o lea e faafofoga tapuai le atunuu.

Ia malie lau Afioga o lea ua ou faaiuina le mataupu lea.

Tofa Hon Lopao Natanielu Mua: Lau Afioga i le Fofoga Fetalai, ia ua lelei faafetai. E na ona fia faamalulu atu lava, leaga o le Tulafono lea na e faamalamalama maia lau Afioga.

SUI FOFOGA FETALAI: Ia faafetai. O le a faasee le vaa o le galuega,

Tofa Olo Fiti Afoa Vaai: Lau Afioga i le Fofoga Fetalai, e faamalulu atu lava i lau Afioga, leaga o lea ua faamaumau tulaga ia i le faanoi foi a le Afioga i le Minisita. Ma e le ao ona faamaumau ni mea faapea i totonu o le Maota, o le Maota mamalu o le atunuu. Ae o tulaga faapea, e moni lau Afioga, e iloa lava le laau i ona fua. Ma o le Maota foi lenei e le soona lafoai faatinomafua ai le tofa, e mataga tele le mea lea.

SUI FOFOGA FETALAI: Ia faatu mai se lafo e aveese upu ia.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Tofa Olo Fiti Afoa Vaai: Ia faatu atu le lafo, *Ina ia aveese upu.*

Susuga Hon Laauli Polataivao Leuatea: E faaluaina lau Afioga i le Fofoga Fetalai, ua le mafaufau upu ia.

Faaluaina e le sui usufono mo Gagaifomauga Nu 3.

SUI FOFOGA FETALAI: O le Tulafono Tumau a faalua le lafo ua tuuina atu le fesili.

Na faamaonia le lafo.

[Upu na faatonu e le Fofoga Fetalai e aveese mai faamaumauga o le saunoaga a le Afioga i le Minisita o Faatoaga ma Faigafaiva - “*Ua fia tuua lou nofoa, ou te fia agai atu i tua, pe maua se faatagaga.*”]

SUI FOFOGA FETALAI: Ua maea ona fai i ai lau faaiuga, ma e le toe fia taua. Malie le Maota, e le tau ina toe taea i so outou finagalo. Ae tulai mai ae se i faasee le galuega.

Se i tulai mai lau Afioga i le sui usufono tamaitai mo Gagaifomauga Nu.3.

Afioga FAAULUSAU ROSA DUFFY STOWERS (Gagaifomauga Nu.3): Malo faafetai i lau Afioga mo le avanoa. Malo foi le onosai i lau Afioga i luitau foi lava o faafoefoega o a tatou Fonotaga.

Ae le i folau lou sa, e faatalofa atu i lau Afioga o lo o nofoia le Nofoa o Tavitai lenei taeao, e faapea foi le Afioga i le Palemia, aua ou te talitonu o le Afioga ia Tuitama o lea ua alaala mai nei, ua toesea le Palemia, o ia lea o le Sui Palemia, ia o lea o le a avea ma Palemia i lau lauga i lenei taimi. E faatalofa atu i lau Afioga i le Palemia faapea foi le mamalu o le Kapeneta, Afioga i Minsita Lagolago faapea foi sui usufono mamalu o le Maota nei.

E faatalofa atu foi i le faafogafoga tapuai mai a Samoa i le tapuaiga a Lana Afioga Mamalu O Le Ao o le Malo ma Lana Masiofo, le Afioga i le Sui o le Fono a Sui Tofia ma lona faletua, le mamalu o le aufaigaluega tofofi a le Atua i so o se fatafaitaulaga, ae a Samoa o faafogafoga mai. Nuunuu atu ia faatini o tausala ou sa ma ou paia Samoa, aua o ou paia ua taoto a o se alao.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Pe oo i ai se faamatalaga pe leai, ia e le toesea ai lava mamalu ma sa o Samoa, mai i le vavau lava ona paia, ia e tau lava i le faavavau.

Ia ona oo atu ai lea o se faamatalaga i ni highlights foi po o ni mea taua na tutupu foi i lenei Paeaiga talu na ofi mai ai foi, pe talu ona folau mai le tatou sa. Ma o ni matatia taua lava ia i lou lava sui ia faa-usufono, o le faakerisianoina lea o le tatou Faavae, ma le faalauteleina lea o le Faamasinoga o Fanua ma Suafa, i le tuuina lea i totonu o le Faavae. Ua mafai ona atagia ai i ina le amanaia o le Pulega a Alii ma Faipule. O highlights e pito i taua lava lea i lou sui usufono i le Paeaiga lenei.

E moni i le tele o Tulafono Tau Faaofi, ae e pei o vaega autu lava ia ia au lava ia e ese ma le taua. Ma e le toe oo foi la i ai se faamatalaga e tau lava ina faaleoina mo faamaumauga. Ia o nisi o vaega e fia taua i le taua o lenei Paeaiga, e moni lelei ia saunoaga ma tuleiga ua tea atu. E ese ai lava le Paeaiga lenei.

Lau Afioga i le Fofoga Fetalai, o le mea muamua lava e ala ai ona ese ia le Paeaiga lenei, ua toa 5 ai tina i totonu o le Maota Fono o Samoa. Ma o se taimi muamua lea, ua oo ai le fuainumera o tina i le 5 i totonu o le Maota lenei. O le isi lenei matatia ua matuai ese ai lava ia le Paeaiga lenei, aua e fai ua na o le toa 5, a o le lalelei foi o tina lea e alaala i totonu o le Maota lenei. Ia ma o i ina la e agai atu ai foi ia se faamatalaga.

E le o po lava i malae le nofoa lea ou te saofai atu ai, o le nofoa o tina ma tamaitai. O le faaatoaina o le 10% e pei ona aiaia mai i le Tulafono, ia atoa le 10% o tamaitai i totonu o le Maota Fono lenei. Ae a silasila lau Afioga i le Fofoga Fetalai foi i le faagasologa mai o le Palemene o Samoa talu mai ona tutoatasi, e le i i ai lava se taimi ua faapea ai ua sao mai ni tina se toatele i le Faiga Palota.

E ui lava e le o tele se va o alii ma tamaitai i le faitau aofai o palota i totonu o Samoa, ae e lilifa lava finagalo o le au palota i alii. Ma e ou te talitonu e mafua mai ona o le tatou tu ma le tatou aganuu. E pei e ave lava le faamuamua i le itupa o alii. O le taimi lenei a fua atu i le faitau aofai i le 2016, e 195,000 ma ona tupu le faitau aofai o Samoa. Ma i le aofaiga lena, e 59% le faitau aofai o i latou o le au palota, 59% o le 195,000 lea. Ae o le 59% lea, e 48% ia le faitau aofai o palota tamaitai, ae 52% le faitau aofai o palota i le itupa o alii. E le o tele lava la se eseese o le au palota e faatusatusa lea i tina ma tamaitai.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae peitai, o le filifiliga lava la e lilifa i le itupa o alii. Ma o le auga la o le faamatalaga, po o le a lava ia le tomai ma le agavaa o se tina, e fai lava sina faigata ona sao mai i totonu o le Maota leni. Ma o i ina lea e agai atu ai sina... se tuualalo lau Afioga i le Fofoga Fetalai, ina ia faamaui. O lea ou te iloa ua i ai le Tulafono ua taoto le Tulafono i sui tamaitai i totonu o le Maota e 10%, ae o a fa siisii atu i luga i le 15%? Po o le numera 7 tina i totonu o le Palemene.

Afioga Alaiasa Muagututi’a Moefaaouo Malagaitutogiai Sepulona Moanau: Lau Afioga i le Fofoga Fetalai...

SUI FOFOGA FETALAI: Malie le sui usufono o saunoa, se i... o se mea e fia faasao po o se mea e fia faamalamalama lea e tulai ai le sui usufono.

Afioga Alaiasa Muagututi’a Moefaaouo Malagaitutogiai Sepulona Moanau: O se mea e fia faasao.

SUI FOFOGA FETALAI: Ia faafetai.

Afioga Alaiasa Muagututi’a Moefaaouo Malagaitutogiai Sepulona Moanau: Ua lagona foi i saunoaga a le sui usufono, e pei ua oo i tulaga ia o le gender equality. E tasi leni issue e ese le tele i le lalolagi i le taimi leni. A na faapea la o se saunoaga lea e fai e se tama, e tele foi le tuuaiga o le a tuuaiina ai tama. O le mea lea ou te talosaga ai i lau Afioga, leaga e pei o lea o le a faaoloataua tina ina ia aua ne i palota i tama i lau lava ia faamasinoga i le saunoaga lea e fai nei.

O le issue lea i le lalolagi, o lea foi e vevesi ai Malo tetele. Ia ae o le tatou atunuu ma le tatou Temokarasi, o lea lava e filemu, o lea lava e filemu. O lou lava manatu ia i le mea nei... ia o le faiga lava ae o lea e sui. A silasila foi ia le sui usufono i le mea lea ua i ai le aufaigaluega ma Ulu o Matagaluega o lea e lolo lava le vai, e olo lava le fua i le itupa o alii. Ia ae o lea e pei e aumai ia saunoaga leaga o lea o le a tatou alo atu i le palota, o le mea lea ou te fautuaina le sui usufono, e tatau ona faavaatele le faamoemoe i leni taeao ma lana saunoaga. Ma le agaga faaaloalo.

SUI FOFOGA FETALAI: Faafetai, e i ai tulaga masani tau i le Faamasinoga, a taua ai mea faapea, ona faapea lea o le Faamasino, can you rephrase your question?

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le uiga la o lau faamatalaga, e faapena foi se lagona o le Nofoa. E taua le finagalo faaalia i lona lava tulaga i lona aotelega, ae e faapena ona fetuunai i le tulaga e aumai ai finagalo.

O le mea la lea, saunoa le sui usufono mamalu, tulai mai le sui usufono.

Afioga Hon Faumuina Tiatia Faaolatane Liuga: Lau Afioga i le Fofoga Fetalai...

Afioga FAAULUSAU ROSA DUFFY STOWERS: Faafetai i lau Afioga i le Fofoga Fetalai...

SUI FOFOGA FETALAI: Malie le sui usufono o Gagaifomauga Nu.3 se i tuu atu lava le avanoa i le sui usufono o Palauli le Falefa.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai, ou te iloa o le folasaga a le sui usufono mamalu e le fia faalavelave foi i lana saunoaga, sa saunoa ai faapea o le tasi lenei o matatia o lenei Nofoaiga. O le avea lea o le tulaga faakerisiano i totonu o le Faavae, i le aoaoga a le Tusi Paia, e le o le tulaga lea. O lea e manino lelei le Tusi Paia, o le context faa fafo lea e tatou te tau o ai. E le fealofani la ma a tatou aganuu ma le tatou talitonuga faakerisiano ma lou faaaloalo.

SUI FOFOGA FETALAI: E pei ua tau mamao foi le alu a le mataupu lea e pei ua fiu foi le faamasino ia e tau faavasega, ae o le agaga ia, ia malie le sui usufono, aumai sao i le tulaga e tatau ona faaleo ai, ae o lena lava e taoto lelei le saunoaga.

Afioga FAAULUSAU ROSA DUFFY STOWERS: Faafetai i lau Afioga i le Fofoga Fetalai, a ou matau atu i sui usufono mamalu ia na tulai nei e faauilavea, e pei e sese ea oti la e fetagisi ai i luga. Ae o le tulaga lea e agai i ai le sui usufono mamalu lea mai i o i Anoamaa, e leai lava se agaga o se faaoloataua o fai i sau faamatalaga. O faamatalaga ia e avatu, o factual information. E le o ni tala foi lea faapea o lea foi e mama lava le avatuina o le tala.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

O le nofoa foi lea ou te nofo ai, o le nofoa o tina ma tamaitai, ae ona o le lagolago a lou itumalo ua ala ai ona ou mauaina le nofoa lea. Ma e ao lava la ona agai i ai se faamatalaga i ai i se sao i le vaega lea. O lea e tau aoao mai ai la ia ni faamatalaga, ia e faamalosi ai sau tala e tuu atu i ina, ae aua e te popole lau Afioga i le sui usufono mamalu.

O le mea foi lea e saunoa i ai o i le itu lea, ia e moni lelei lava. O le agaga ia o le faamatalaga, leaga e taua ia te au. E taua le tuuina i totonu o le Faavae, e taoto lelei i le agatonu le faaupuga e Faavae i le Atua Samoa, aua e na o le pau lava lena o le mea sa i ai. Ae o lona faakerisianoina o le Atua le Tama, le Atua le Alo ma le Atua le Agaga Paia, o i ina lea na agai i ai se faamatalaga.

Ia faamolemole, aua le toe tulai ifo se isi i luga. O la e le o tulai lava i luga le Afioga i le Palemia, ae.. ia o le agaga lena o le tuualalo. Pe o le a se...

Afioga Hon Tuitama Talalelei Tuitama (Minisita mo Tina ma Tamaitai, Atinae o Nu'u ma Afioga ma Agafesootai): Lau Afioga i le Fofoga Fetalai...

SUI FOFOGA FETALAI: O lea la ua tulai mai talu ai lou taea fua o le maaveave le fua, ia ae tuu atu le avanoa i lau Afioga...

Afioga Hon Tuitama Talalelei Tuitama: Ua ou tulai atu e faaalua lou lagolago atoatoa i le saunoaga a le sui usufono. E talu ai o le matafaioi lena a lenei Matagaluega o lo o tauave i le taimi nei, o le amanaia lea o aiatatau a Tina ma Tamaitai o Samoa, faaauau lau saunoaga o lo o matagofie.

SUI FOFOGA FETALAI: Ia o lea ua faataga atu e le Minisita e le o le Nofoa, ia ae saunoa.

Afioga FAAULUSAU ROSA DUFFY STOWERS: Se maimau e pe a na faapea e te toe ofi mai i le tausaga fou, aua e mautinoa lava ou te toe oo mai, ona toe tuliloa lea o lau saunoaga lea. O le tuualalo la e faapea, po o a fa ae toe siitia i luga o le 15% po o le i ai o le 7 tamaitai i totonu o le Maota. Afai e le talafeagai le toe suia o le Tulafono lea e i ai nei i le 10%, pe i ai se isi faiga e mafai ai ona toe faaopoopo mai nisi tina se toa 2 ia maua ai le toa 7 i totonu o le Maota. Ia o le talosaga lena ma se tuualalo.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ia ae o se tasi o mataupu i lou tulai mai ai foi e ese ma le taua i totonu o le Maota i lenei vaitau o le soifuaga, o le Matagaluega lea o Leoleo. Ou te talitonu na afea foi i saunoaga ma fetalaiga i le taimi ua tea, i le saogalemu o Samoa aemaise lava foi i le tulaga lea tau fualaa faasaina. Ma o i foi, o lea foi e nofo malamalama foi lava i ai, o le Pulega a alii ma faipule e ese ma le taua, i le lagolago malosi lea i le galuega a le Matagaluega o Leoleo ma Falepuipui.

Ae e le i mamao atu sa ou vaai ai i le TV, i le alaalafaga lea o Faleatiu, na faasau ai i le TV ia se latou fesoasoani i le galuega a Leoleo, i le taumafai lea ia i ai ni sa po o tapu, i le auala lea e agai ai tagata i le mea foi lea e tele ai ia fualaa faasaina. Ma o se galuega lelei, o se galuega foi e manaia pe a mafai ona fetuutuunai ai le tofa a alii ma faipule i totonu o nuu ma afioaga, ina ia mafai ai ona maua i latou ia e faatinoina ia lea soligatulafono. Ma e ala ona fai se faamatalaga, o le taimi lenei, e le o aliali tele mai i luga ia le faafitauli lea. Ae ou te talitonu ma le atoatoa, masalo po o le isi 5 i le 10 tausaga, it will be a silent killer for our youth, le tulaga lea o fualaa faasaina mea ia o aisa. Ae o le taimi lenei...

Afioga Hon Afamasaga Lepuiai Rico Tupai: Lau Afioga i le Fofoga Fetalai, pe maua se avanoa faamolemole.

SUI FOFOGA FETALAI: Malie le sui usufono o Gagaifomauga Nu.3 sui usufono tamaitai, se i tuu atu pea le avanoa i le Afioga i le Minisita o Fesootaiga..

Afioga Hon Afamasaga Lepuiai Rico Tupai: Ia faafetai e le i naunau foi e faalavelaveina le saunoaga matagofie a le Afioga i le sui usufono mamalu. Ae ua ou tulai atu ona o lea sa taua ia si o matou afioaga i Faleatiu ma le tulaga o le galuega lelei o lo o faia i le fesoasoani ai i galuega a leoleo, malu o le Malo. Ia leaga o lea sa i ai ma le isi tamai faaupuga lea e faapea e o lava i uta i le mea o lo o tele ai ia le fualaa faasaina. E pei o le mea lena o lea ua ou tulai ai lau Afioga, e le o i ai ni mea i uta i o. E molimau atu e pei o le tele o taimi e na ona asia e leoleo ma masalomia ia o a ni mea o maua mai ai, ia ua le o toe i ai se mea.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

E pei o le tulaga lea e atagia ai le lelei o Pulega a alii ma faipule. O lea ua foliga mai ua amata lava ona le toe i ai ni mea faapea i totonu o si o tatou atunuu. Ia ae o lo matou itumalo ia, o lena ua faamatala aloaia mai e le sui usufono, ia le taua tele o le galuega a alii ma faipule o fesoasoani ai i le Malu o le Malo, ma ua faapena ona toafilemu ai mea uma ma vave ai ona solofa ia le tele o nei Tulafono i lo tatou atunuu atoa e le faapea e na o lou itumalo o i ai nei mea.

Ae e taua ia o le saunoaga a le sui usufono i le tulaga lea i tamaitai lau Afioga, ona e toe faamanatu ai pea i ai tatou le tulaga o Samoa i totonu o le Pasefika i le mea lenei o le faaopoopoina o tamaitai ma le aloaia o tamaitai i totonu o le Maota. O Samoa o le atunuu muamua o le Pasefika ua faia ai lea Tulafono ina ia faaopoopoina ia tamaitai ma o latou nofoa, ia pe a faapea e le atoa le 10% o le tou paau mai i le maea ai o le faiga filifiliga, ia ona toe faaopoopoina lea aloaia o le tulaga la lea e pei ona saunoa ai ia le Afioga ia Faaulusau, i lona ofi mai ona o le tele o ana palota na maua mai i le faiga filifiliga a le atunuu sa i ai.

Ia ae faamalo i le sui usufono mamalu i le lagalaga i mea lelei, ae faafetai foi i le tapuaiga.

SUI FOFOGA FETALAI: Faafetai, o le tiute lava lea o sui usufono mamalu filifilia mai i lea itumalo i lea itumalo. O le puipuga lava o le mamalu ia o lona itumalo ma afioaga. O lea foi ua saunoa le Afioga i le Minisita ia, e sao lelei O le mea lea e fautuaina ai foi le sui usufono mamalu o saunoa, ia aloalo ese ma le tauina o afioaga, ia ae tau pea se tasi o nuu ma tulaga faapena i le tulaga aloaia ma le tulaga faaaloalo.

Ia ae faapena se vaivaiga o le Nofoa, ae tapa lau Afioga i le sui usufono o saunoa...

Afioga Hon Tialavea Fea Leniu Tionisio Hunt (Minisita mo Leoleo ma Falepuipui): Lau Afioga i le Fofoga Fetalai e fia maua se avanoa..

SUI FOFOGA FETALAI: Ia, o se mea e fia faamalamalama pe o se mea e fia faasao...

Afioga Hon Tialavea Fea Leniu Tionisio Hunt: Faamalamalama lau Afioga.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

SUI FOFOGA FETALAI: Ia faafetai, se i tulai mai e saunoa lau Afioga i le Minisita...

Afioga Hon Tialavea Fea Leniu Tionisio Hunt: E faafetai atu i le sui usufono e tusa ai ma le momoliina mai foi o le faafetai i le Matagaluega. E pau le mea e fia... o le raid lea talu ai, e le i o e saili ia ni fualaau faasaina. O le sueina mai o le pagota lea ua fiu e sue o Chong Nee. Sa maua mai faamatalaga o lo o nofo i luga o atumauga o le alalafaga lea, na ala ai ona alu le raid lea.

Ae i fualaau faasaina, o lo o tele lava se galuega a le Matagaluega a Leoleo ma le Matagaluega a Tiute i le tausailia o pusa oloa ia mai i totonu. O le tasi lea o auala e mafai ona aumai ai i totonu ia cocaine ma fualaau faasaina aemaise foi le mariuana. E maua mai foi i totonu i i ae e manaomia e le Matagaluega le lagolagosua a le mamalu o le atunuu.

A faapea o silafia e nisi se mea o gaosi ai le fualaau leni i totonu o le atunuu, ia e tatalo atu faamolemole e logo le Ofisa o Leoleo ona o atu lea e saili mai. E le mafai ona fai na o le Ofisa o Leoleo le puipuiga o fualaau faasaina i totonu o le atunuu, e manaomia le lagolagosua a le mamalu o le atunuu. E logo mai pe a faapea e i ai nisi o le alalafaga o lo o faaaogaina ia o latou maota e gaosia ai ia le aisa i totonu o maota. Ia aua e mafai lava ona fai i fualaau o lo o maua i totonu o Samoa nei, ma le faaaloalo.

SUI FOFOGA FETALAI: Faafetai, ia o le tulaga lava faa-fautuaga, o saunoaga ina ia alofia ia tulaga o le aliali mai o suafa o afioaga ma tulaga faapena. Ia ae o na e i ina le tofa, ia o le aumaiga o le finagalo o le sui usufono, ia o le tulaga o le faafetai i le agaga o le lagolago o alii ma faipule.

Tapa lau Afioga i le sui usufono o Gagaifomauga Nu.3.

Afioga FAAULUSAU ROSA DUFFY STOWERS: Faafetai i lau Afioga i le Fofoga Fetalai. Faafetai foi i le Afioga i le Minsita mo le faalauteleina foi lava o se faamatalaga i fualaau faasaina. Ae faamalulu atu i le Afioga i le Minisita o Fesootaiga, pe a faapea ua afea se tasi o afioaga o lona itumalo i se tala. Ae e tatau ona fiafia i ai o lea e avatu le faaeaea i se tasi o nuu o lona itumalo, ona o le galuega lelei o lo o faatino. Ae afai ua sese le faaupuga o se tala i se isi itu, ia o le mea lena e tau o lape i lauga lea e tele ona tatou vevesi ai i totonu o le Maota leni, faamalulu atu ai i le Afioga i le Minisita.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae o lea foi lava e... na ou faapea foi lava ita ia sa ou manatu ae o lea ua faafetai o lea ua saunoa mai le Afioga i le Minisita o Leoleo ma Falepuipui. Ae e ala ona tulai ifo le Afioga i le Minisita lea o Fesootaiga ona o le taua o le suafa o lona itumalo. Ia a la e lava e alaala mai le Afioga i le Palemia e tali mai i se mea ou te manao i ai. Ia ae o le tatalo lena i lau Afioga i le Minisita, ia ina ia... o le a mataituina foi.... ae o lou foi lava matau lena.

Ou te talitonu o lo o fausia i inei ia le aisa o le ala maua lena i totonu...

Afioga Hon Tuitama Talalelei Tuitama: Lau Afioga i le Fofoga Fetalai, leai e na ona fesosoani atu i le Afioga i le sui usufono...

SUI FOFOGA FETALAI: Saunoa lau Afioga i le Minisita o Tina ma Tamaitai, ma Agafesootai.

Afioga Hon Tuitama Talalelei Tuitama: Leaga o lea e saunoa o uta la e tele ai le mea, ae tau lava ona ou fesoasoani atu, le iloa pe tele atu tai i lo o uta. Ia o le fesoasoani atu lea.

SUI FOFOGA FETALAI: Ia e tapa le sui usufono e faaauau le saunoaga. O saunoaga lava o fautuaga faa-Toeaina.

Afioga FAAULUSAU ROSA DUFFY STOWERS: Ia faafetai, ona faagata mai foi lea o lea mataupu, ona oo atu lea o se tala foi i le Matagaluega o Aoga, le Afioga i le Minisita o Aoga, Ofisa Sili o Pulega faapea le Matagaluega o Aoga. Malo lava faafetai mo le galuega faatino. Ua matauina lava ua siitia lava tulaga o le aoaoina o alo ma fanau o Samoa. Ae matauina e lou sui usufono, e i ai ia Vaega Faaupufai foi ia ua ave i latou Manulauti, le tologiina o faiaoga i aoga a Ekalesia. A o se mataupu lea sa ou pese atu ai lava i le amataga o lenei Paeaiaga.

Ae ua ala ona ou taua i le taimi lenei, o le momoli o lau faafetai i le Afioga i le Palemia ma le Minisita o Tupe ma le Minisita o Aoga, o lea o le a fai. O la ua amata ona tapena, faafetai lava mo le taliaina o se talosaga, ona ou te talitonu, o na ua amata ona tapena ina ia mafai ai ona ausia ia aiaiga po o fua faatatau e mafai ai ona tologiina faiaoga ia o aoga a Ekalesia. Faafetai tele lava o le mafuaaga lena na ala ai ona lotea i.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae o lea la ua ou taua ia le Matagaluega lea, faamolemole la, o lea e maua foi o lea e i ai se seleni i le malae taaalo o si ou nuu o Aopo, ia o lena e taoto i ina o se taimi o i luma ona faaoo mai lea. E tatalo atu ai lava faamolemole ina ia faataunuuina, ia aua foi la ua tele ia tamaiti taaalo i lo matou itumalo, ia ma la foi ua tau faaleleia ifo le matou malae taaalo faaitumalo. O lea e maua atu i isi saunoaga a isi sui usufono mamalu ia..

Tofa Olo Fiti Afoa Vaai: Lau Afioga i le Fofoga Fetalai, o si mea lava lea e fia faamalamalama. Faafetai...

SUI FOFOGA FETALAI: Saunoa le sui usufono o Salega.

Tofa Olo Fiti Afoa Vaai: Faafetai i le Afioga i le sui usufono mamalu, o lea ua na ia taua ia le vaega lea faapea ua i ai isi Vaega Faaupufai ua latou faia le anavatau lea o le totogi uma o faiaoga a Ekalesia ma Aoga Faataitai. E manaia ia o le tulaga lea, ae na pau lava le mea ou te fia faamanatu i le Afioga i le sui usufono mamalu, na ou faalogo foi i isi lauga a le vaega a le tatou Faigamalo, i le 2011 ia ma tua atu foi, ae le i i ai ma se mea ua faataunuuina.

Ae o le Vaega Faaupufai la a le FAST lea e alu atu nei, Samoa e moi lava le faiga lea. E te fiu foi e te toe talosaga mai e le faia lava se mea. Ma le faaaloalo.

SUI FOFOGA FETALAI: Malie le sui usufono o saunoa, e le i taua lava le Vaega Faaupufai e aafia ai le sui usufono lea e saunoa. O lo o i ai, o upu ia, o lo o i ai se Vaega Faaupufai. E le o taua lava le Vaega Faaupufai o lea e i ai i le faauilavea.

O le mea la lea ou te tapa le sui usufono o Gagaifomauga Nu.3. e faaauau lau saunoaga.

Afioga Afamasaga Lepuia Rico Tupai: Lau Afioga i le Fofoga Fetalai malie pe maua se avanoa? Tulai atu ma le faaaloalo...

SUI FOFOGA FETALAI: Saunoa mai le Afioga i le Minisita.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga Afamasaga Lepuiai Rico Tupai: Tulai atu ma le faaaloalo ona o saunoaga e taua ai saunoaga ua tuana'i, ia e tatalo atu ma le faaaloalo, ia ona o lea lava na o tatou omai foi i lenei Nofoaiga, e leai ni folafolaga faapea o faia. E oo mai lava i lenei taimi, o lo o faapena ona faaauau pea lava ona tapena le Malo e tali i nisi o tulaga faapenei i tulaga o faiaoga ma aoga aua le lumanai. Ae leaga o lea e faafofoga le atunuu, sa faapea sa tau i le 2001, 2010 ia ou te manatu au ia ia aua ne i faaaogaina ia faamatalaga faapenei, ina ne i taitaiina sese ai le faafofoga a lo tatou atunuu faamolemole.

SUI FOFOGA FETALAI: Faafetai...

Tofa Olo Fiti Afoa Vaai: Lau Afioga i le Fofoga Fetalai, o le mea e fia faasao, leaga o le taimi lena o le 2006.....

SUI FOFOGA FETALAI: Malie le sui usufono ia o lea la o le a oulua talanoa o lea e tu le lauga lea. E i ai ia tatou Tulafono Tumau e le mafai ona agai se faauilavea i i se faauilavea a se isi...

Tofa Olo Fiti Afoa Vaai: Ia o le taimi lena sa tau faufau lona sa e agai mai. O lea ou te talanoa atu i le taimi lena ma le faaaloalo.

SUI FOFOGA FETALAI: Malie le sui usufono se alofa mai i le Nofoa, ia e faapena lava...

Susuga Hon Laauli Polataivao Leuatea: Lau Afioga i le Fofoga Fetalai fia maua se avanoa? E ese si au mataupu...

SUI FOFOGA FETALAI: Faafetai...

Susuga Hon Laauli Polataivao Leuatea: Ioe o le agaga faaaloalo, e leai se faalavelave a o folau le sa o le isi o lenei foi itumalo.

SUI FOFOGA FETALAI: Ia aua o lou tuafafine lava lea e saunoa, ia ae saunoa mai.

Susuga Hon Laauli Polataivao Leuatea: Malie lava ona o le manumanuga i a tatou faamaumauga. E tausisi atu pea i lau Afioga i le Fofoga Fetalai leaga o lea ua tatou talanoa e faalupe i le Afioga i le Palemia.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae ta liu foi ae popoe e moi foi o lea e tatou te talasua, ae o faamaumauga a le Maota e tumau. Ne i alu alu aso fesili ane fesili ifo, ia po o ua i ai ni tofiga fou, ia ae o lea e tulai atu ia le Taitai o le Malo i nisi o tulaga, ae o lau tatalo lena. Faaulusau, ina ne i te i ua matau mai ua e faia foi se isi mea fou, ia ma faalupe le Afioga i le Minisita o le Palemia, ia ae alu aso sau aso. O si au tatalo na, e le o ni ai avea lau Afioga i le Minisita, ia ae tatou tausisi leaga o faamaumauga e tumau. Ia ae faalupe pea, o lea ua tulai ese le Afioga i le Palemia, ae tulai mai pea tulaga o le Kapeneta e tali tali o matou manatu ma lagona o lea e avatu. O si au tuualalo lena lau Afioga ina ia taoto i lagatonu ia le ta lauga.

SUI FOFOGA FETALAI: Faafetai mo fautuaga, ia o le ala foi lena o lea e faafofoga mai o lea e avatu se tala a le Nofoa i le Minisita o Tina ma Tamaitai ma Agafesootai ma Afioga. Ia ae e manaia le fautuaga

Afioga Hon Loau Solamalemalo Keneti Sio: Lau Afioga i le Fofoga Fetalai.

SUI FOFOGA FETALAI: O lea foi e faafofoga atu ia le sui usufono mamalu ia o lo o saunoa. Se i tuu atu la le avanoa i le Afioga i le Minisita o Aoga.

Afioga Hon Loau Solamalemalo Keneti Sio: Faafetai, e le fia faalavelaveina le lauga matagofie a le sui usufono i le matau atu. Ae ona o lea e pei e matau atu, o le a lagalaga ai foi ni mataupu e ono le lelei i le faalogo ia ma ta i tua le tili. Agai sao le Afioga i le sui usufono i le totogiina o faiaoga a Ekalesia e pei o le matau atu lea. E sao lelei o lo o faagasolo fuafuaga ma faataatia fuafuaga a lo tatou Malo i le tulaga lea. E pei o le a se auala e talafeagai ai ona totogi e lo tatou Malo. E le o amataina la, o la ua oo i le ogatotonu o le taimi lenei, ioe le tapenaga aua e le faigofie.

Ae mo le silafia e le Maota, o lo o totogi i le taimi lenei e ala atu i le grant foi lea e taua o le OGG, One Government Grant. O lo o totogi ai faiaoga, 60% o le tupe lena, o lo o faatinoina ai totogi ai faiaoga a Ekalesia ma Aoga Tumaoti. O lona uiga la, o la e totogi ma le agaga faaloalo.

SUI FOFOGA FETALAI: Faafetai i le saunoaga a lau Afioga i le Minisita, tapa le sui usufono mamalu o Gagaiifomauga Nu.3 ia e faaauau lau saunoaga.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Afioga FAAULUSAU ROSA DUFFY STOWERS: Faafetai i lau Afioga i le Fofoga Fetalai, e na ona tau lava na ou fia pai i le vaega lea e taua ai le Afioga i le Minisita o Tina ma Tamaitai, e le o i ai lava ma se agaga foi lea i nisi tulaga foi lea e... ae e manatua foi lea e saunoa se sui usufono e pei o lau tautala lea ou te talanoa atu ai, e te oo lava i lau Afioga i le Fofoga Fetalai, lau Afioga i le Palemia, o i ina lea e agai i ai le tala.

Po o alaala mai lava la le Afioga i le Palemia pe leai, ae o la ou te talitonu, e avea lava latou o le Kapeneta o sui ia o le Palemia i totonu o le Maota pe a toesea. E pei foi o lau Afioga, pe afio mai le Fofoga Fetalai pe leai, e faalupe lava ia le Fofoga Fetalai o lau Afioga lava lea.

Ia ona oo atu lea o le tala i le Matagaluega lea o Faiga Palota. Sa matauina e lou sui usufono le vaitaimi foi lea ona ua faagata po ua toe faaopoopo le taimi foi lea e lesitala ai le au palota. Sa vaaia ai ma le faanoanoa le tumutumu ma le afaina ai o nisi o le mamalu o le atunuu i le mea lea na tumutumu ai e omai e lesitala ai i le taimi mulimuli. Ae mataulia foi o le tatou atunuu lava e faapena, e faatalitali lava i le taimi mulimuli faatoa lolofi loa lea e faataunuu se faamoemoe.

Ae ou te talitonu, e i ai ia auala ma metotia e mafai ona uia, e mafai ai ona tau foia le faafitauli lea. E agai la se faamatalaga i i le Matagaluega lea o Faamaumauga, o Statistics. O i latou lea e collect mai ia le faitau aofai o le atunuu, o i latou o lo o soifua o le au palota vaega eseese uma, ia o a fa, ae le faaaogaina mai ia le data lea e collect mai e le Matagaluega o Faamaumauga, ina ia ave se avanoa e mafai ai ona faaaogaina e le Matagaluega o Faiga Palota, e mafai ai ona i ai se latou vaai mamao pe toa fia ni tagata o lo o totoe e le i resitalaina ona faaoga ai lea o faamaumauga lea e aumai mai o i le Matagaluega o Faamaumauga. O lea e tau tilotilo atu i se auala e mafai ai ona foia le faafitauli lea, aua e talitonu e tupu pea lava pea, ae e i ai auala e mafai ai ona share le information i totonu o le Matagaluega lava ia, Matagaluega e talafeagai...

SUI FOFOGA FETALAI: Se i tuu atu le avanoa i le Minisita mo Faiga Palota.

Afioga Hon Faaolesa Katopau T. Ainuu (Minisita mo Faiga Palota): Lau Afioga i le Fofoga Fetalai, e faamauina le manatu o le sui usufono mamalu, a o lo o galulue faatasi le Ofisa o Faiga Palota ma le Ofisa o Fuainumera Faamauina i le taimi nei mo se faiga e mafai ai ona faaoga e latou le data a le Ofisa o Fuainumera.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaaauu i luga o le faitauga faalua**

Ia, ma le isi mea o le vaaiga lea na tatou vaai i ai i le resitalaina lea na tumutumu ai le mamalu o le atunuu, e le tatau ona oo i le tulaga lea. Ua ala ona oo i le tulaga lea, ona o le fiu o le Ofisa o Faiga Palota e faasalalau, na ato le tausaga o tuu i ai e omai e transfer, omai e resitala, ae na tuu lava e tagata o le tatou atunuu i le taimi mulimuli. O le mafuaaga lea na tulai mai ai le toatuga lea na tatou matamata i ai. I le ava ma le agaga faaaloalo.

SUI FOFOGA FETALAI: Ou te manatu o lea ua faamanino mai ae faaaauu le saunoaga a le sui usufono mamalu o lo o saunoa.

Afioga FAAULUSAU ROSA DUFFY STOWERS: Faafetai i lau Afioga i le Minisita. Ia, na ona faaleoina atu lava o ni tuualalo ina ia mafai ai ona faaaogaina e mafai ai ona foia le faafitauli lea, ona e mafai ona faaaogaina information ia e iloa ai vaega eseese o le atunuu o lo o moomia ai ona agai i ai le aufaigaluega. E pei o se faamoemoega lena o se fia talanoa atu.

Na pau ia o vaega taua sa fia oo i ai se faamatalaga, ona o le taua i lou nei sui usufono. Ae o le a agai loa se faamatalaga i le sologa lelei o le tamaoiga o le atunuu i lenei vaitau, aemaise lava i le vaitaimi lenei o le faamai lea e i ai. Na amata mai lava i le misela e oo mai lava i le taimi lenei, ua ova atu ma le tausaga talu ona i ai tapu ma sa i totonu o le atunuu. Ae o le a le tulaga lea e i ai? E pei lava e leai se mea o tupu. O le soifuaga lava ia o lea e soifua ai Samoa, o lea e tele ina sologa lelei, e leai se mea o afaina ai. Ae a tatou vaavaai i atunuu i fafo, na ona maua lava i le faamai, matua tele lava le afaina, tele o le afaina o le tamaoiga. A o faailoga vaaia ia o le mautu lelei o le tamaoiga o Samoa, le tapenaga sa tapena mai ai e i latou foi o lo o tulai mai i le foe. Malo faafetai. Lau Afioga i le Minisita o Tupe ma le Matagaluega, ia ma le paia o le Kapeneta ma le Afioga i le Palemia, se malo lava, malo lava. Ua matua leai lava ma se mea lava o tupu iinei ia Samoa, leai ma se mea. Ai lava na o le aufaigaluega i le vaega o turisi lea e tau afaina, a o la e lava e matuai soifua lelei, leai ni mea faapea o sioti, leai ma se mea. A o le tele o atunuu la e i fafo, sioki mai ia mea, sioki mai ia mea, oka. E pei lava e leai se mea o tupu i totonu o le tatou atunuu. Malo lava le tautua, malo le lotonuu ma le alofa moni ia Samoa.

O isi faailoga e fia faaleoina ai le agaga o le faafetai ma o i ina e iloa ai le siitia o auunaga ia e faatino e tatou Matagaluega ma Faalapotopotoga a le Malo, ua siitia latou auunaga, ua matuai tele lava le suiga o auunaga faatino a Matagaluega ma Faalapotopotoga. Ua tele atinae ua tulai mai, e le mafaitaulia foi.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae o le galuega a le Palemene lea e fai, e taunuu mai i totonu o le Maota lenei tualumaga o galuega faatino a Matagaluega ma Faalapotopotoga i tausaga taitasi. O le taunuuuga o a latou galuega ma atinae o lo o faatino, e taunuu mai i totonu o le Maota lenei. O Komiti Faa-Palemene e iloiloina Lipoti nei Faaletausaga.

I le taimi ina ua ou faatoa taunuu mai i totonu o le Maota, sa tau tuai laitiiti le sau a le Lipoti i totonu. Ae a le taimi lenei ina ua faamaea le Paeaiga? Ua up to date uma Annual Reports a Matagaluega ma Faalapotopotoga. O le isi ai pito i sili lena ona taua. O lona aoga, e le gata e aoga mo le vaavaai mamao lea agai luma i le fuafuaina i le agai i luma, ae aoga mo le Matagaluega lava ia, po ua ausia ana matafaioi na faataatitia, po o ausia le paketi sa fuafuaina, ma o le tele foi o lona aoga, e aoga mo le fuafuaina o le tatou paketi lea faaletausaga a le tatou Malo. E oo foi la i le Lipoti lea a le Matagaluega o Tupe, aua e pei lava o le Matagaluega o Tupe e tuai lava, a o lea ua oo mai i le taimi lenei, oi sole, e le mai foi lava le Matagaluega o Tupe ia, ua matuai sau foi ia i totonu. Uma ona okika, uma na saina le Auditor, ua up to date uma mea uma, ua faigofie ia i latou foi o lo o fuafuaina le faatatauina o seleni i totonu o le tatou atunuu, ua faigofie ona vaai tonu lava i mea la e manaomia. Ma o le malosiaga foi lena o le Malo, o Matagaluega ma Faalapotopotoga lea e faatinoina le auaunaga. E to lou pulou ia outou nei o Ofisa Sili o Pulega o Matagaluega, ma le paia ma le mamalu o le aufaigaluega ma Faalapotopotoga. Oka! Se malo fai o le faiva. Malo le galulue. Ou te alu ese ma le Paeaiga lenei, a ua matuai malie le loto i le tou auaunaga, le tou auaunaga faatino e ala lea i tou Lipoti e tuuina mai ma galuega o lo o faatino. Faafetai le alofa ia Samoa, faafetai le lotonuu.

Ia, ona oo atu lea o se faafetai foi i le Faafetauagai a le Malo. Faafetai i lau Afioga i le Fofoga Fetalai, lau Afioga i le Sui Fofoga Fetalai, lau Afioga i le Failautusi ma le Sui Failautusi ma le mamalu o le Matagaluega. Malo le tautua, ua matou matananana ai lava i le tou faiga o i matou, faafetai lava le onosai. Malo le onosai, aua o isi taimi, se o le matuai faalogogata lava o sui usufono mamalu o le Palemene. Ae faafetai, malo le onosai.

Lau Afioga i le Palemia ma le mamalu o le Kapeneta, ia e le tau selu atu. O a uma ni faaletonu ma ni mea lelei, e lafo atu uma i ina, o outou lea e taitaiina le Malo, o outou o lo o fuafuaina ma faatatauina le tamaoaiga o Samoa, ma o le tamaoaiga foi lena ma lona lelei e maua ai le fiafiaga e tua i o tatou tagata ma ola fiafia ai o tatou tagata, ma ola filemu ma fealofani ai o tatou tagata. Malo faafetai fai o le faiva, malo le talia o le valaauina ua tofofi ai outou e le Atua.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaaauu i luga o le faitauga faalua**

Ia, lau Afioga i le Faamasino Sili ma le mamalu o le Faamasinoga o Soligatulafono, malo faafetai mo galuega faatino, o outou o lo o avatu i ai mataupu e luitau ai foi outou olaga i o outou tiute tauave ma outou tiute fai. Malo faafetai i le tofa feliuliui ai ina ia maua ai se agatonu i ni mataupu o lo o oo atu i ina i le Faamasinoga.

Ia, e faapea foi ona momoli atu le faafetai i le Afioga i le Peresetene ma le Vasega o Faamasino i totonu o le Faamasinoga o Fanua ma Suafa. E ese ma le taua o lo outou valaauina, o measina a aiga, o nuu ma afioaga, o outou e lufilufiina pe a oo atu i totonu i ina ni mataupu. Ia, sagai ane ai o le tai ina ia faatino lo outou valaauina na tofofi ai outou e le Atua. Ae malo lava le galulue, faafetai mo le tautua.

SUI FOFOGA FETALAI: Ua ou faalavefau o saunoa le sui usufono mamalu, ua faafofoga foi le Palemene faapea foi le itumalo o Gagaifomauga Nu.3 ma Samoa aoao. Talu ai ona o lea ua taunuu le Palemene i tulaga masani e faamaea ai ana galuega i lea aso ma lea aso, ua manatu ai, o le a faagata mo le taimi nei le lauga e tapena ai mo le aso a taeao e te tuvaoa ma faaaauu ai galuega tau le aso o le Malo a taeao.

I lenei vaega o le Fonotaga, ou te manatu o lea ua logologo pualilo nai olo, ua foa foi le papa nai pululauie i fetalaiiga ma saunoaga aua le faafofoga mai ma le tapuaiga a le atunuu aemaise nai o tatou itumalo. O lea foi ua faafofoga atu le Taitai o le Malo, le Aiga Kapeneta i tulaga o le aumaiga o fautuaga ma manaoga foi o tatou itumalo, ia na ona momoli atu lava o le faafetai ma le faamalo a le Nofoa. Malo tapena, malo sauni, o lea ua faafofoga itumalo taitasi sui usufono mamalu uma sa saunoa i lenei taeao, ia tuu laia, lafo laia o lo outou tauau i le Faigamalo ma le taitaiga o le tatou atunuu. Ua faafofoga foi le lagi i o outou manaoga ma tulaga uma, ia, o Ia lava e faataunuaina mea uma. O le tagata na ona fuafua ae le o ia te ia sona faataunuiina o se mea e tasi, na o le Atua, o le Atua o le tamaoaiga, o le mana ma le malosi uma lava, na te faataunuaina mea uma ma manaoga o si o tatou atunuu.

Ia, e faamalulu atu i le Maota, aemaise lau faafofoga mai Samoa. Afai foi ua laavale se faamatalaga a le laulau ma le Nofoa, matua atu i ina, fale i le fale o le Atua la outou tofa ma le faautautaga e malu ai le galuega a le Fofoga Fetalai.

Ae le i tuua le mea nei, faamanuia le Atua i mea uma. O le taape atu, ia muaau ma muliau le Atua e taunuu ai i le manuia i aiga taitasi o tapuai mai i Lona alofa ma Lona Agalelei tele.

03 FEPUARI 2021

**Tulafono Tau Faaofi o le Faatatauina o Tupe Faaopoopo (Nu.1)
2020/2021 – felafolafoaiga faaauau i luga o le faitauga faalua**

Ae le i tolopoina galuega a le Maota i lenei aso, ou te valaau atu ma le faaaloalo i lau susuga i le alii faifeau le sui usufono mo Anoamaa Sasae e te faaiuina le Fonotaga i se tatalo. Ma le faaaloalo.

Na tolopo Taulumaga a le Fono Aoao Faitulafono i le itula e 1:03 i le afiafi seia aulia le Aso Tofi, 04 o Fepuari 2021 i le itula e 9:00 i le taeao.